



74
6640
55



24
6640
55

五禮通考卷第一百四十三

內廷供奉禮部侍郎金匱秦蕙屏編輯

兩淮都轉鹽運使德水盧寬曾

李天德總督蘇都御史桐城方觀承訂

直隸按察司副使元和宋堯

參移

嘉禮十六

飲食禮

蕙田案周禮大宗伯以嘉禮親萬民以飲食之禮親宗族兄弟大傳云上治祖禰尊尊也下治子孫親親也旁治昆弟合族以食序以昭穆別之以禮義人道竭矣小記曰親親以三爲五以五爲九上殺下殺旁殺而親畢矣坊記曰君子因睦以合族嗚呼此堯之所以克明俊德以親九族九族既睦平章百姓者也周之盛也內睦九族外尊事黃耆則有常

五禮通考卷第一百四十三 飲食禮



木下中也
1911
寄贈

91-0732

三禮集卷一百四十三
一
棟行葦之詩及其衰也葛藟頰弁角弓枌杜
刺焉先王之於宗族兄弟也親睦之因而燕
樂之故有族燕之禮有族飫之禮文王世子
若公與族燕則異姓爲賓膳宰爲主人公與
父兄齒族食世降一等周語王公立飫則有
房烝親戚燕饗則有餽烝飫以顯物宴以合
好夫曰燕曰飫皆所謂飲食之禮也陳氏禮
書云古者合族之禮方其平居無事則有燕
以申好及其有大疑謀則有飫以圖事燕則
脫屣升堂坐而不立其牲體折節而餽烝所
以致愛飫不脫屣升堂立而不坐其牲半解
而房烝所以致嚴致愛致嚴其禮盛矣然燕
之禮又有二有時燕有因祭而燕詩常棣儉

爾邊豆飲酒之飫兄弟既具和樂且孺湛露
厭厭夜飲在宗載考周語時燕不淫此時燕
也詩楚茨諸父兄弟備言燕私既醉既飽小
大稽首行葦戚戚兄弟莫遠具邇曾孫維主
酒醴維醑坊記因其酒肉聚其宗族此因祭
而燕也禮書云其禮之詳雖不可考要之服
皮弁服卽於路寢宰夫爲主異姓爲賓王與
族人燕于堂后率內宗之屬燕于房其物餽
烝所以合好也其食世降一等所以辨親疏
也昭穆以敘之所以明世次也夜飲以成之
所以別異姓也若夫几席之位升降之儀脫
屣而坐立監相視羞庶羞以盡愛爵樂無算
以盡歡其大率與諸侯燕禮不異蓋先王之

禮以孝弟治天下而孝弟莫始於親親親親之心無所不至則飲食之禮隆焉且不特天子諸侯而已儀禮特牲祝告利成徹庶羞設于西序下鄭康成註引書傳曰宗室有事族人皆侍終日大宗已侍于賓奠然後燕私燕私者何也祭已而與族人飲此徹庶羞置西序下者為將以燕飲與書傳云不醉而出是不親也醉而不出是潔宗也出而不止是不忠也親而甚敬忠而不倦若是則兄弟之道備故曰君子篤於親則民興於仁此物此志也夫大宗伯敘為嘉禮第一通典通解通考皆莫詳今從周禮之次序於昏冠之上而九族三族錫姓命氏天子睦族宗子收族立後

之法以類附焉觀於此者孝弟之心可以油然而生矣

觀承案儀禮有公食大夫禮有鄉飲酒禮有燕禮鄉飲酒與燕其牲皆狗然骨體致敬庶饒盡愛亦可云食而曰飲者有舉有薦薦為舉設故曰飲也公食大夫其牲則牢其儀則具饌于東房而無尊雖酒亦實于解加于豐而賓引奠于薦右而不飲其後有卒食之文而無卒爵之文故曰食禮食與飲之分各有其具者如此至王之食禮九舉公侯之食禮七舉王燕飲酒膳夫為獻主公侯燕飲酒宰夫為獻主是其等威之辨也而周禮酒人共賓客之禮酒飲酒而奉之注曰禮酒燕饗之

酒飲酒食之酒曲禮之酒漿處右即食酒所謂酌也又酒正有三酒四飲之辨三酒事酒昔酒以飲清酒以祭四飲清醫漿醢皆以共食清即醴也凡醴啐而不飲故冠昏饗食之禮皆設醴而不酬酢間有酢者亦啐之而已此更飲與食所分之明證也夫饗禮鄭氏以為無正文然體薦餼烝立以卒事其文具在由是推之則族飫之禮其即饗禮乎族食其即食禮乎族燕之有賓主固即燕禮而又曰族飲者亦即賓主以為言曰族燕不即賓主以為言曰族飲非二禮也若公與族之私飲酒是固有私飲時或即詩與書傳所言燕私謂燕即族燕而以私為厚解如君之私于寡

君人人以為孟嘗私己者似燕與私為一事尚覺未安何也燕不可混于私也周禮膳夫凡王之稍事設薦脯注云稍事是小事與臣飲酒大事則有燕饗也故止設薦脯若此則王與族人圖大事設族飫其小事則私飲酒是在外臣有稍事之飲而在宗族即謂之私飲酒然則禮于異姓有饗有食有燕飲有稍事之飲而在同姓則有族飫族食族燕飲以及私飲酒之儀相配以成文于以見王道公私之無閒禮文雖缺義可互參因此通彼歷歷皆可遍觀而盡識也

周禮大宗伯以飲食之禮親宗族兄弟

注親者使之相親人君有食宗族飲酒之禮所

以親之也文王世子曰族食世降一等大傳曰繫之以姓而弗別綴之以食而弗殊百世而昏姻不通者周道然也

疏此經云飲食亦尊卑通有下文別有饗燕

則經云飲者非饗燕是私飲酒法其食可以通燕食俱有其下不別云食故也注引文王世子據人君法引大傳據大夫士法則萬民亦有此飲食之禮也

蕙田案注分飲食解雖細私飲酒謂在路寢不在庭即所謂族燕族飲是也與下饗燕自有別

禮記大傳上治祖禰尊尊也下治子孫親親也旁治昆弟合族以食序以昭繆別之以禮義人道竭矣注治猶正也繆讀為穆

疏旁治昆弟之時合會族人以食之禮

陳氏祥道曰飲食者人情之合歡者也觀文王燕兄弟而棠棣之美作幽王不能宴樂同姓而頰弁之刺與則合族以食禮之大者也禮曰君與族人燕則膳宰為主人又曰族食世降一等詩曰厭厭夜飲在宗載考國語曰親戚饗宴有饋烝又曰歲飫不倦時宴不淫則族食之禮合之以時等之以世掌之以膳夫其薦也以餉烝其飲也或以夜不特如此而已序以昭繆別以禮義則尊者安于為尊卑者安于為卑然後孝慈友恭油然而生於其間人道不竭于此矣乎蓋合族以食恩也昭繆禮義所以節恩者也無恩則離恩而無以節之則亂先王之於宗族使不至於離且亂無他盡人道以治之而已汪氏克寬曰合族以食使之有所同而尊卑之禮一序以昭繆使之有所異而親疏之義明如此則皆有禮義之別而人之道盡於此矣

同姓從宗合族屬異姓主名治際會注合謂合之宗子之家序昭穆也異姓謂來嫁者也

主於母與婦之名且際會皆姻友接之會也疏同姓從宗者同姓父族也從宗謂從大小宗也合族屬者謂合聚族人親疏使昭為一行穆為一行同時食故曰合族屬也

繫之以姓而弗別綴之以食而弗殊疏綴之以食而弗殊者連綴族人以飲食之禮而不殊異也

陳氏祥道曰以飲食之禮親宗族兄弟所謂綴之以食也

君有合族之道族人不得以其戚戚君位也疏合族者言設合族人之道

陳氏祥道曰君之於族人主乎愛族人之于君也乎敬故有合族之道所以明其親親之恩不得以其戚戚君位所以明其尊尊之義不能親睦九族燕樂同姓與夫恃親而不恭者豈知此哉

呂氏祖謙曰君有合族之道如詩所謂飲食燕樂同姓是也

右飲食通義

文王世子君公與族燕則異姓為賓膳宰為主人公與父兄齒族食世降一等注異姓為賓謂同宗無相賓客之道膳宰為主

注君尊不獻酒也與父兄齒親親也族食世降

等親者稠疎者稀 疏明公與族人燕食之禮燕飲必立賓以行禮異姓為賓
必對主人君尊不宜敵賓故使供膳之宰以為主人使得抗禮酬酢也公既不為
主族人又不為賓故與族人相齒見親親也族食謂與族人燕食也族人既有親
疏燕食亦隨世降殺假令本是齊衰一年四會食若大功則一年三會食小功則
一年二會食總麻則一年
一會食是世降一等也

觀承案族食世降一等則至總麻其降已窮
綴食之屬疏同姓也不在此列明矣月令大
合吹注云與族人大飲作樂於大寢以綴恩
疏引綴食以釋綴恩之義似即指此為綴食
之時而其釋族人也又曰三族依然世降一
等之族未及同姓又云食常無樂明此為飲
禮而非食禮也明堂禮季冬命國為酒以合
族亦然大率禮之言族皆九族不及同姓詩
傳之言宴樂同姓多與族混不可為典要惟
大傳言同姓與族之分最明其曰同姓從宗

合族屬注云合之宗子之家序昭穆也其釋
合也曰同食蓋先王慮恩之殫於遠也命以
百世不遷之宗則同姓之屬即有百世相宗
之誼從宗合族即所謂綴食弗殊也意自相
承似不必別為附會

公與族燕則以齒而孝弟之道達矣其族食世降一等
親親之殺也注與族燕則以齒以至尊不自異於親之列殺差也 疏公所

民有親屬者豈得相背棄哉
每世而降一等是親親之殺

陳氏滌曰族人雖眾其初一人之身也豈可以賓客之道外之故以異姓為賓
而使膳宰為主與之抗禮酬酢君尊而賓不敢敵也君雖尊而與父兄列位序
尊卑之齒者篤親親之道也族食與族人燕食也世
降一等謂族人既有親疏則燕食亦隨世降殺也
方氏慈曰凡燕之禮必立賓以備酬酢之儀然主人者尊賓既謂之賓則尊之
而已非親之也親莫親于同姓則凡于同姓固無賓之之禮也故燕族之賓不
以同姓而以
異姓為之也

蕙田案此君與族人飲食之禮曰族燕曰族

食燕之禮多食之禮殺也燕有樂而食常無樂

月令季冬之月命樂師大合吹而罷

注歲將終與族人大飲作樂于大寢以綴恩也言罷者此用禮樂於族人最盛後年若時乃復然也凡用樂必有禮用禮則有不用樂者王居明堂禮季冬命國為酒以合三族君子說小人樂疏與族人大飲者以王居明堂禮云季冬命國為酒以合三族故知與族人飲也云作樂於大寢者以其命樂師合吹故知作樂也大寢則路寢也與宗人圖事之處既飲族人故知於大寢云以綴恩者綴謂連綴恩謂親大傳云繫之以姓而弗別綴之以食而弗殊云罷者此用禮樂於族人最盛後年季冬乃復如此作樂以一年停頓故云罷大合吹必當有禮與族人燕飲今惟云命樂師故云用樂必有禮而食常無樂故云禮有不用樂也引明堂禮以合三族者三族父子及身則小記云親親以三為五以五為九是也君子說謂卿大夫士小人樂謂凡庶也

蕙田案此宗族燕食之時與樂也

逸禮王居明堂禮季冬命國為酒以合三族

汪氏克寬曰孝弟莫始於親親則燕之禮不得而廢設其器備其物辨其數立其文莫尊乎君也不以位加于父兄燕序必以齒達乎孝弟之道也莫親乎同姓也不可以無殺燕則族人世降一等焉凡燕之禮必主賓以備酬酢而族燕之賓主則異姓與膳宰為之者篤親親之道也夫飲食口腹之欲也而必節之以禮則驕奢淫佚平而無過也歌舞耳目之欲也而必和之以樂則言動指遜易而無乖也莫不由親以篤乎恩有恩以著乎愛有愛以盡其禮焉

詩小雅常棣序常棣燕兄弟也

此詩為兄弟者其父之親非而廣之同姓同族皆是也

常棣之華鄂不韡韡凡今之人莫如兄弟

鄂足得華之光明則韡韡然盛喻弟以敬事兄兄以榮覆弟恩義之顯亦韡韡然傳聞常棣之言為今也 變聞常棣之言始聞常棣華鄂之說也如此則人之恩親無如兄弟之最厚

何氏楷曰常棣與唐棣異木爾雅云唐棣移常棣棣案此則惟常棣得以棣名程子云今玉李也華鄂相承甚力陸氏曰江南呼為麥李一耐輒生二萼兩兩相麗如垂絲海棠陸佃云移從移棣從唐棣之華反而後合常棣華鄂上承下覆甚相親爾從棣言華萼相承輝榮相聚也棣仁也移義也兄弟尚親親仁也故常棣以燕兄弟宋祁云世人多誤以唐棣為常棣於兄弟用之唐棣移也移開而反合者也此兩物不相親鄂當作萼曹憲云花苞也唐明皇以華萼交輝名樓正

詩緝嚴氏案曰玉李其華繁密其鄂豈不韡韡光明乎華以覆萼萼以承華華萼相承覆而光明猶兄弟相承覆而榮顯也凡今之人與我交接者皆莫如兄弟之至親也凡今之人總言下文朋友妻子也一章發端端姑言兄弟之常而辭氣抑揚之間已有感歎不盡之意其斯周公之心乎

死喪之威兄弟孔懷原隰哀矣兄弟求矣

詩緝嚴氏案曰一章以華萼相輝喻兄弟之求顯姑以安樂之時言之既而斷以凡人皆不如兄弟則安樂之時未足以見其情之切至於是一章以下皆以

死喪急難之事驗之死喪可畏怖之事他人未必相念維兄弟甚相思念也方困窮流離羣聚於原野之時維兄弟則相求以相依也

朱子詩傳言死喪之禍他人所畏惡惟兄弟為相恤耳至于積尸哀聚於原野之間亦惟兄弟為相求也

蕙田案孔懷謂兄弟之患難相恤為可念即下句所言是也朱子說最為緊切

何氏楷曰此就常情而言上章所謂莫如兄弟者於此驗之最為親切

脊令在原兄弟急難每有良朋況也永歎

朱子詩傳脊令雖渠水鳥也脊令飛則鳴行則搖有急難之意故以起興而言當此之時雖有良朋不過為之長歎息而已力或不能相及也

呂氏祖謙曰疎其所親而親其所疎此其本心者也故此詩反覆言朋友之不如兄弟蓋示之以親疎之分使之反循其本也本心既得則山親及疎依然有敘兄弟之親既篤朋友之義亦敦矣初非薄於朋友也苟雜

施而不孫雖曰厚於朋友如無源之水朝滿夕除胡可保哉何氏楷曰禽經云脊令友梯張華注云脊令其母者飛鳴不相離故所以喻兄弟兄弟急難者言兄弟相急於患難謂相救也春秋傳急病讓夷戰國策以公

子高義能急人之困字法本此

蕙田案此前後三章最情理之實非親歷者不能道亦不能知也非至聖烏能體貼至此

兄弟鬩于牆外禦其務每有良朋烝也無戎

詩緝嚴氏案曰兄弟或不相得鬪鬪於牆內非令兄弟也然有他人來侵侮之則同心以外禦為務不以小忿而敗親也良朋雖眾然無相助者言兄弟之令者猶勝朋友之良者也

輔氏廣曰二章至四章兄弟真切之情惟於此際而後得見分曉

張氏敘曰二章正言兄弟休戚之相關三章四章又以朋友相較而徵其莫如也脊令水鳥在原則失所故興急難况况通雖滄况不甯徒付之長歎而已不能身與其難也烝盛氣貌戎兵也雖憤於橫逆而無不反兵之理則亦無能與戎以禦之也急難者好兄弟也鬪鬪者惡兄弟也兄弟不論好惡而皆勝於朋友謂之良朋亦非朋友之薄也義合之分止如是爾雖急難死生之際固有可託以濟者然非常也曰每昔則義亦不相礙矣

喪亂既平既安且甯雖有兄弟不如友生

詩緝嚴氏案曰情義之輕重當於死生患難之時觀之若喪亂既平安甯無事之時則以為兄弟不如友生矣何不於死喪患難之時以觀之乎

儻爾邊豆飲酒之飫兄弟既具和樂且孺

傳儻陳私也不脫

履升堂謂之飫九族

會日和孺屬也王與親戚燕則尚毛箋私者圖非常之事若議大疑於堂則有
 飲禮焉聽朝為公九族從已上至高祖下及元孫之親也屬者以昭穆相次序
 此章言王者親宗族也王有大疑非常之事與宗族私議而圖之其時則陳列
 爾王之籩豆為飲酒之飲禮以聚兄弟宗族為好焉為此飲及燕禮之時兄弟既
 已具載矣九族會聚和而甚欣樂且復骨肉相親也言由王親宗族故宗族亦
 自相親也既私釋言文孫炎曰飲非公朝私飲酒也周語有王公立飲又曰立成
 禮而己既既為私不在公朝在路門內也酒肉所陳不宜在庭則在堂矣燕禮
 云皆脫履乃升堂少儀云堂上無跣燕則有之是燕由坐而脫履明飲立則不脫
 矣故云不脫履升堂謂之飲箋解飲為私之意以私在路寢堂上故謂之私若聽
 朝則為公事對公故言私也知飲禮為圖非常議大疑者以周語云王公之有飲
 禮將以講事成禮建大德昭大物言講事昭物是有所謀矣明圖非常議大疑而
 為飲禮也周語曰王公立飲則有房丞視燕則有饋丞又曰飲以類物燕以
 合好則飲燕禮異序曰燕兄弟此陳飲者圖非常議大疑乃有饋則飲大於燕
 燕亦是王於族親之禮故陳之示親親也飲禮議其大疑則婦人不與立以成禮
 則不必和樂下章云妻子好合此傳曰王與族人燕則尚毛以此詩飲燕雜陳故
 下箋云王與族人燕則宗婦內宗之屬亦從后於房中是此章之中兼燕禮矣上
 二句為飲下二句為燕飲陳籩豆燕言兄弟互以相兼也儒釋言文李巡曰孺
 骨肉相親屬也中庸曰燕毛所以序齒文王世子曰公與族人燕則以齒而孝弟
 之道達矣王與宗族人燕以毛髮年齒為次第也司儀曰王燕則諸侯毛亦謂同
 姓諸侯也故彼注云謂以髮鬢為坐朝事尊尊尚齒燕則親親尚齒云親親是燕
 同姓
 明矣

妻子好合如鼓瑟琴兄弟既翕和樂且湛箋好合志意合也合

應和也王與族人燕則宗婦內宗之屬亦從后於房中疏上章並陳飲燕之禮
 此又論內外之歡也王與族人燕於堂上則后與宗婦燕於房中主之族人見王
 和於時兄弟既會聚矣其族人非直內和妻子又九族和好所樂而且湛又以盡
 歡也箋此解天子自燕宗族兄弟所以得致妻子好合之意以其王與族人燕則
 宗婦內宗之屬亦從后於房中而燕故有妻子好合之意也宗婦者謂同宗大夫之妻也
 內宗者同宗之內女嫁於卿大夫者春秋莊二十四年夫人姜氏入大夫宗婦觀
 用幣謂之宗婦明是宗族之婦也故賈注皆云宗婦同姓大夫之婦襄二年傳曰
 葬齊姜齊侯使諸姜宗婦來會葬諸妻謂齊同姓之女宗婦謂齊同姓之婦是同
 姓大夫之婦名為宗婦也周禮春官序官云內宗凡女之有爵者注云內女王同
 姓之女謂之內宗有爵其嫁於大夫及士者是王同姓之女名為內宗也天子燕
 宗族之禮亡所以知王與族人燕則宗婦內宗從后者湛露曰厭厭夜飲不醉無
 歸傳曰夜飲私燕也宗子將有事族人皆入侍不醉而出是不親也醉而不出是
 諸侯之禮猶宗子燕族人則天子燕宗族兄弟為朝廷臣者如宗子於族人可知
 案特牲饋食禮祭末乃曰徹庶羞設於西序下注云為將饒去之庶羞主為尸非
 神饌也尚書傳曰宗室有事族人皆侍終日大宗已侍於賓奠然後燕私燕私者
 何也已而與族人飲也此徹庶羞置西序下者為將以燕飲與然則自尸視至於
 兄弟之庶羞宗子與族人燕飲於堂內賓宗婦之庶羞主婦以燕飲於房也鄭以
 彼特牲是宗子之祭禮族人及族婦皆助故經云宗婦執兩邊宗婦贊豆是宗婦
 及族人俱助宗子之祭及至末族人既為宗子所燕明宗婦亦主婦燕之可知也
 且上文庶羞尸祝兄弟之等男子有庶羞宗婦及內賓婦人亦有庶羞今直云徹
 庶羞明二者俱徹二者俱燕也故云視至於兄弟之庶羞宗子與族人燕飲於堂
 內賓宗婦之庶羞主婦以與燕飲於房中曲禮曰男女不雜坐謂男子在堂上
 女子在房故族人在堂宗婦在房也宗婦得與於燕明內宗亦與其中可知宗子
 之禮既然故知天子燕族人之禮亦然故云王與族人燕則宗婦內宗之屬亦從
 后於房中此證妻子好合言宗婦并言內宗者內宗宗婦之類因言之此燕及
 妻而連言子者此說族人室家和好其子長者從王在堂孩稚或從母亦在兼言

蕙川案王與族人飲食之禮有二一曰族燕
族食文王世子所稱者是也族燕族食皆燕
也而亦有不同平居無事則為燕以申好大
傳所謂合族以食大戴記季冬命國為酒以
合三族是族燕也又因祭而燕楚茨諸父兄
弟備言燕私中庸燕毛所以序齒是亦族燕
也一曰族飫因圖事而飫與燕不同國語王
公諸侯之有飫也將以講事成章建大德昭
大物也故立成禮烝而已注立成不坐也烝
升也升其滿物而已又曰歲飫不倦時燕不
淫據此則燕之禮主於親愛而和好飫之禮
主於嚴肅而整齊嚴肅者易倦親愛者易淫

故國語云然是燕與飫固大有別也此詩傳
箋正義敘燕飫之禮頗詳然傳以第六章儻
爾籩豆為飫私又曰王與親戚燕則尚毛是
一章而飫與燕兼之箋直據國語之文以證
飫私之義疏遂以上二句為飫下二句為燕
飫燕雜陳竊謂毛鄭特泥飫字而為此解耳
此詩專為燕兄弟而作上五章備言兄弟所
以當親愛之故至此乃入燕飲正文極道其
和樂之情飫字第寫其醉酒飽德之意非所
謂圖非常議大疑之事也又六章妻子好合
如鼓瑟琴兄弟既翕和樂且湛蓋亦申言飲
食宴樂兄弟和好之義似亦不專指宗婦內
宗燕於房者言故先儒說詩多不從箋疏之

說今以其論燕飮之禮頗詳姑存之然亦不甚明晰

李氏光地曰此二章言終兄弟之愛之道也人之幼也兄弟同羣飲食必俱相親相思故曰孺慕也離居異食則意漸疎故必常陳酒食使兄弟具在則其和樂也且將如孺子時矣人方未有妻子兄弟之愛無衰也有妻子則有閒之者俱有妻子則又有交相閒者兄弟之愛往往不終矣夫妻室各緣異姓之合不能與我齊心固恆情也兼於各子其子則視兄弟愈隔故必使妻子與我好合如琴瑟之同調而無異聲則兄弟翁聚而不散其和樂也且將耽嗜以終身矣

宜爾室家樂爾妻帑是究是圖宜其然乎

詩緝嚴氏祭曰言爾能與兄弟翁合則可宜爾之室家樂爾之妻帑爾試窮究之圖謀之庶幾信吾之言乎
李氏光地曰序以為周公所作其極情理之至信非聖人不能道然傳所謂弔二叔之不咸漢儒或指夏商之末其說近是序遂以管祭之事當之反覆篇中言兄弟急難禦務發乎天性正與管祭相反如謂詭詞以哀之則又無復勸戒之意故宋傳但以燕飮兄弟為說文王之德刑于寡妻至于兄弟由關雎以至麟趾之應故周公推以著訓者如此

蕙田案此詩燕飮兄弟故極道兄弟天性之親切驗之死生急難而愈真情意之和樂推之妻子室家而大順要皆由燕飮兄弟以合

之此飲食之禮所以重也

詩大雅行葦序行葦忠厚也周家忠厚仁及草木故能

內睦九族外尊事黃耆養老乞言以成其福祿焉箋九族

至高祖下至元孫之親也疏親睦九族非直其父祖子孫而已故言上至高祖下至元孫之親見高祖五服之內皆親之文王世子云族食世降一等則天子所燕及者非獨五服之內此唯言九族者言親親以及遠舉九族以見同姓皆親之

宋子詩傳此祭畢而燕父兄耆老之詩

李氏光地曰燕同姓之詩也宋傳以為祭畢者以列在大雅別於小雅之燕饗云

敦彼行葦牛羊勿踐履方苞方體惟葉泥泥戚戚兄弟

莫遠具爾或肆之筵或授之几傳戚戚內相親也肆陳也或陳筵者或授几者愛王與族人燕兄弟之

親無遠無近俱揖族而進之年稚者為設筵而已老者加之几

詩緝嚴氏祭曰首章發兄弟之愛也言敦敦然聚者是彼道旁之蘆葦勿令牛羊踐履之此葦方苞而成叢方體而成莖其葉初生泥泥潤澤而可愛忍傷之乎草之叢生如兄弟之聚也戚戚然親愛之兄弟切莫疎遠宜俱相親近也

真氏德秀曰使人主能體此章之旨則雖一草一木且不敢輕於摧折也况骨肉之戚而縱尋害乎此詩二章以下皆言燕樂兄弟之事然必以此心為之本

而後燕樂不為虛
文不然非所知也
呂氏祖謙曰戚戚兄弟莫遠具爾忠厚之意萬然
見於言語之外矣下章之燕樂皆所以樂於此也

肆筵設席授几有緝御或獻或酢洗爵奠俎醢醢以薦
或燔或炙嘉穀脾臠或歌或嘏傳設席重席也歌者比於琴瑟也徒擊鼓曰嘏疏毛以為承上肆

筵設几之文更申其事言王於族人既為肆之筵上又設重席其授几之人尊敬
老者則有致敬踞踏之容既設几筵族人升堂受燕或乃主人進酒而獻之於賓
賓既受卒爵或乃酌而酢答主人主人卒飲又洗爵酢以酬賓賓受而奠此舉不
復舉之王與族燕以異姓為賓使幸夫為主人行此獻酢之禮也鄭以上二句特
為老者設文既為老者肆筵又重設席
授之以几復有惇史相續代而侍之

朱子詩傳言侍御獻醕飲食歌樂之盛也

黃氏佐曰侍御以養其體飲以養其陽食以養其陰歌樂以和其心燕禮之盛如此所以示慈惠也

敦弓既堅四鍤既鈞舍矢既均序賓以賢敦弓既句既
挾四鍤四鍤如樹序賓以不侮

朱子詩傳言既燕而射以為樂也

詩緝嚴氏案曰既燕族人而射以為樂

李氏光地曰既燕而射以樂之且觀德焉先序其賢多者射也既序其不侮敬者慶也雖同姓亦曰賓故下曾孫曰主

曾孫維主酒醴維醕酌以大斗以祈黃耆黃耆台背以
引以翼壽考維祺以介景福

詩緝嚴氏案曰述既射而復燕因以乞言也為之主者成王也其酒醴皆醇厚矣遂以長柄大斗從大器中酌之於尊以為禮而求於黃耆之人謂乞言也兄弟之中有老者焉古者燕飲於旅也語必因以求詢於老成人不徒為燕樂也大老告成王以善道引導輔翼以成其德故自天佑之成王得壽考吉祥助其大福也

李氏善曰侍御之盛言其人之不乏也獻醕之盛言其禮之無闕也飲食之盛言其物之豐也歌樂之盛言其聲之和也前二章未射而飲燕之始也故備言其禮樂之盛後二章既射而飲燕之終也故惟致其頌禱之誠言之固有秩序也

蕙田案常棣行葦二詩古盛王以飲食之禮
親宗族兄弟之實際也夫由身而推之分形
同氣者莫如兄弟皆吾親之體也自五服之
屬以及於無服之族皆吾祖一人之體也君
子齊家以治國親親而仁民必自其所厚者

禮記卷之三十一 飲食禮 三

始親之則思所以厚之厚之則思所以樂之此飲食之禮所以不能已也至親莫如兄弟其情非可以言說喻也常棣爲燕飲之樂將以深致其莫可喻之情而反極之急難禦務以著其非良朋所得而擬而復道其燕會歡飫室家好合以感動其天性之良骨肉之愛所以體貼精到而反覆長言之者殆無以加矣行葦由物理以察人倫維葉泥泥戚戚兄弟之詞懇款親切惻然唯恐傷之千載而下猶能使人興起聖人篤親親以化平天下其精意固如此矣至於禮樂牲醴之盛威儀節次之詳則又有可考焉先之以肆筵設几筵有席几有御陳設之備也繼之以獻酢奠

賓主之禮也考燕禮諸侯燕其臣以膳宰爲主人主人獻賓賓卒爵賓洗爵酢主人主人卒爵主人獻公公卒爵公酌酢主人主人卒爵於是主人酌以酬賓賓奠而不舉詩之或獻或酢洗爵奠畢正與禮合文王世子云族燕則異姓爲賓膳宰爲主人是也其牲牢酒醴則有醯有醢有燔有炙正饌之外則有嘉餚有脾臠有籩豆而從獻加爵之禮行矣若夫合樂以道和而或歌或嘏燕射以爲樂而序賓以賢序賓以不侮至於敬老乞言頌禱之事無不舉焉嗚呼可謂盛矣蓋其合也禮樂之美兼有饗食之儀文而將之以親愛本之宗廟之昭穆而聯之以歡樂所謂別之以

禮義而孝弟之道達者歟飲食之禮見於禮經者甚略今詳疏其辭義以補逸禮之所未備云

小雅湛湛湛湛露斯在彼豐草厭厭夜飲在宗載考

茂也夜飲必於宗室 豐草喻同姓諸侯也載之言則也考成也夜飲之禮在宗室同姓諸侯則成之於庶姓其讓之則止 疏豐草得露則湛然柯葉低垂以與王之燕飲于彼同姓諸侯此同姓諸侯得王燕飲則威儀寬縱也王與歡酬至於厭厭安閒之夜留之私飲雖則辭讓以其宗室之故則留之而成飲不許其議以崇親厚焉

蕙田案此註疏以為同姓諸侯也

楚茨諸父兄弟備言燕私

傳燕而盡其私恩 爰祭禮畢歸賓客俎具我當與之燕而盡其私恩也 疏其諸父兄弟留之使皆備

樂具入奏以綏後祿爾殽既將莫怨具慶既醉既飽小

大稽首神嗜飲食使君壽考孔惠孔時維其盡之子子

孫孫勿替引之

君之福祿安女之殺羞已行同姓之臣無有怨者而皆慶君是君也小大猶長幼也同姓之臣無已醜飽時拜稽首曰神乃歆諸君之飲食使君壽且考此其慶詞 疏宗族不親則公室傾危故骨肉歡而君之福祿安同姓無怨而皆慶是其歡矣神嗜飲食以下是慶詞也 蔣氏惇生曰卒章同姓復燕於寢以厚其恩也

中庸燕毛所以序齒也

朱子章句燕毛祭畢而燕則以毛髮之色別長幼為

坐次也

陳氏禮書先王之於同姓有時燕焉有因祭而燕焉國語曰時燕不淫此時燕也詩曰諸宰君婦廢徹不遲諸父兄弟備言燕私坊記曰因其酒肉聚其宗族以教民睦此因祭而燕也其禮之詳雖不可考要之

服皮弁服即於路寢

王皮弁以日視朝詩刺不能宴同姓而曰有頰者弁則皮弁也宰夫為主

異姓為賓王與族人燕於堂后帥內宗之屬燕於房

其物餼烝所以合好也其食世降一等所以辨親疏

也昭穆以序之所以明世次也夜飲以成之所以別
異姓也若夫几席之位升降之儀脫履而坐立監相
禮羞庶羞以盡愛爵樂無算以盡驩其大率蓋與諸
侯燕禮不異諸侯燕族人與父兄齒雖王之尊蓋亦
不以至尊廢至親也

國語周語定王謂晉隨會曰郊禘之事則有全烝王公

立飲則有房烝注禮之立成者為飲親戚燕饗則有餽烝注餽烝升體節

之折今女非他也而叔父使士季實來唯是先王之宴禮

欲以貽女余一人敢設飲禘焉夫王公諸侯之有飲也

將以講事成章注章章也建大德昭大物也注大德大功也故立

成禮烝而已注立成不坐也烝升也升其備物而已飲以顯物燕以合好注顯物示物備也

故歲飲不倦時燕不淫

敬王十年襄弘欲城周衛彪後見單穆公曰昔武王克

殷而作詩作此以為飲歌名之曰支以遺後之人使永

監焉夫禮之立成者為飲昭明大節而已

魯語公父文伯之母祭悼子康子與焉胙不受徹俎不

宴宗不具不繹繹不盡飲則退注昭謂立曰飲坐曰燕言宗具則與繹繹畢而飲不盡飲禮而退恐有醉

飽之失皆所以遠嫌也

公父文伯之母欲室文伯饗其宗老請守龜卜室之族

師亥聞之曰善哉男女之饗不及宗臣宗室之謀不過

宗人

陳氏禮書古者合族之禮方其平居無事則有燕以
申好及其有大疑謀則有飲以圖事燕則脫履升堂
坐而不立其牲體折節而餽烝所以致愛飲不脫履
升堂立而不坐其牲體半解而房烝所以致嚴周語
曰王公之有飲禮立成禮烝而已又曰歲飲不倦然

則飫以圖事非必歲為之也國語言歲飫時燕蓋明其疏數之異而已衛彪叅曰武王克商作詩以為飫歌名之曰支以遺後之人使永監焉以其戒慎尤在於厭飫之時也公父文伯之母祭悼子康子與焉繹不盡飫而退則飫非燕禮之多儀也

詩王風葛藟序葛藟刺平王也周室道衰棄其九族焉

疏棄其九族者不復以族食族燕之禮敘而親睦之故王之族人作此詩以刺王也

葛藟在河之滸終遠兄弟謂他人父謂他人父亦

莫我顧疏王族宜得王之恩施猶葛藟宜得河之潤澤王何故遺棄我宗族之人乎

葛藟在河之涘終遠兄弟謂他人母謂他人母亦

莫我有疏上言謂他人父責王無父恩此言謂他人母責王無母恩也然則下章謂他人昆責王無兄恩也

葛藟在河之滸終遠兄弟謂他人昆謂他人昆亦

莫我聞

小雅頍弁序頍弁諸公刺幽王也暴戾無親不能宴樂同姓親睦九族故作是詩也疏時同姓之諸公刺幽王也為不能宴樂即不能親睦睦睦由於宴樂以經責王之不宴樂今不親睦故分而言之耳

有頍者弁實維伊何爾酒既旨爾殽既嘉豈伊異人兄

弟匪他焉與女蘿施于松柏未見君子憂心奕奕既見

君子庶幾說懌愛禮天子諸侯朝服以宴天子之朝皮弁以日視朝女酒者豈有異人疏遠者乎皆兄弟與王無他言至親刺其弗為也幽王久不與諸公宴諸公未得見幽王之時懼其將危亡故憂而心奕奕然若已得見幽王諫止之則庶幾其改

有頍者弁實維何期爾酒既旨爾殽既時豈伊異人兄

弟具來焉與女蘿施於松上未見君子憂心怲怲既見

君子庶幾有臧變意解懌也

觀承案頍弁集傳謂燕兄弟親戚之詩不從傳專言同姓然禮族燕必以異姓為賓異姓

飲食禮

古稱曰甥舅則雖宴同姓固有異姓之賓在且角弓之詩曰兄弟婚姻亦兼異姓為言序主九族傳又從之何一從而一否也是序說原未可廢第傳曰宴序曰刺不宴樂意若相反然詩曰爾酒爾殽曰君子維宴安在其非宴乎曰死喪無日無幾相見安在其非刺乎一再讀之乃知詩固宴也宴而情不迫於棠棣文不備於行葦雖宴無以成懼故詩人傷心於集霰以著交瘡之漸迨胥遠胥傲斯角弓興悲而葛藟有終遠之誚杖杜抱獨行之感焉傳表其事序推其微文殊而義一也細繹之自得然則角弓諸詩為不合族者示戒也類弁之詩又為合族而情文不具者示戒

由是觀之飲食之於人道不綦重乎至伐木之詩曰民之失德乾餱以愆又知非特兄弟族姓間為然矣

角弓序角弓父兄刺幽王也不親九族而好讒佞骨肉相怨故作是詩也

辟驛角弓翩其反矣兄弟昏姻無胥遠矣爾之遠矣民胥然矣爾之教矣民胥傲矣此令兄弟綽綽有裕不令兄弟交相為瘡

民之無良相怨一方受爵不讓至於已斯亡

德饅飽也

老馬反為駒不顧其後如食宜饅如酌孔取

蕙田案二詩據注疏謂皆刺王不能親睦兄

宜令之飽如飲老者則當孔取取謂度其所勝之多寡凡器之孔其量大小不同老者氣力弱故取義焉王有族食族燕之禮疏言王有族食族燕之禮者解經所以有食酌之事食則族食酌即族燕矣以食禮無飲燕法無食故如二事也

弟之作夫有常棣行葦之盛則有葛藟頰弁
角弓之衰盛衰之際所係顧不大歟

唐風杜序杜刺時也君不能親其宗族骨肉離散
獨居而無兄弟將為沃所并爾

有杜之杜其葉湑湑獨行踽踽豈無他人不如我同父
嗟行之人胡不比焉人無兄弟胡不飲焉

有杜之杜其葉菁菁獨行嘽嘽豈無他人不如我同姓
嗟行之人胡不比焉人無兄弟胡不飲焉

蕙田案此係諸侯之詩故附於後

春秋文公七年左氏傳宋昭公將去羣公子樂豫曰不

可公族公室之枝葉也若去之則本根無所庇蔭矣葛

藟猶能庇其本根故君子以為比注謂詩人取以喻九族兄弟況國君乎

此諺所謂庇焉而縱尋斧焉者也必不可君其圖之親

之以德皆股肱也誰敢攜貳若之何去之不聽

蕙田案飲食之禮所謂親之以德也葛藟之

喻警切動人

右經傳飲食禮

史記齊悼惠王世家孝惠帝二年齊王入朝惠帝與齊

王燕飲亢禮如家人

漢書中山靖王勝傳議者多冤鼂錯之策皆以諸侯連

城數十秦彊欲稍侵削數奏暴其過惡諸侯王自以骨

月至親今或無罪為臣下所侵辱建元三年代王登長

沙王發中山王勝濟川王明來朝天子置酒勝聞樂聲

而泣問其故勝具以吏所侵聞於是上乃厚諸侯之禮

省有司所奏諸侯事加親親之恩焉

昭帝本紀元鳳二年夏四月上自建章宮徙未央宮大

置酒賜宗室子錢人二十萬

後漢書光武帝紀建武十七年冬十月甲申幸章陵修園廟祠舊宅觀田廬置酒作樂賞賜時宗室諸母因酣悅相與語曰文叔少時謹信與人不款曲唯直柔耳今乃能如此帝聞之大笑曰吾治天下亦欲以柔道行之和帝本紀永元十五年冬十月戊申幸章陵會宗室於舊廬勞賜作樂

後漢書注蔡質漢儀曰正月旦天子幸德陽殿臨軒公卿大夫百官各陪朝賀宗室諸劉雜會萬人以上冊府元龜北魏孝文帝太和十九年正月辛未車駕在懸弧朝饗羣臣初帝嘗詔延四廟之子下逮元孫之胄申宗宴於皇信堂不以爵秩爲列悉序昭穆爲次用家人之禮燭至公卿辭退帝曰燭至辭退庶姓之禮在宗

載考宗族之義卿等且還朕與諸王宗室欲成此夜飲北魏書孝明帝本紀熙平二年八月戊戌宴太祖以來宗室年十五以上於顯陽殿申家人之禮

隋書禮儀志北齊宴宗室禮皇帝常服別殿西廂東向七廟子孫皆公服無官者單衣介幘集神武門宗室尊卑次於殿庭七十者二人扶拜八十者扶而不拜升殿就位皇帝與宗室伏皇帝坐乃興拜而坐尊者南面卑者北面皆以西爲上八十者一坐再至進絲竹之樂三爵畢宗室避席待詔而後復位乃行無算爵

冊府元龜唐太宗貞觀十九年征遼迴幸定州時太子監國處定州詔定州管內孝行著聞者宜與宗室老人同賜宴會

文宗開成元年十二月帝於禁中會宴諸王因命講讀

劉仲武每雙月入內對諸王仍令尙書供食 三年四月甲午帝幸十六宅賜諸王宴頒賜有差 後唐莊宗同光三年正月甲午皇太后生辰御嘉慶殿召諸王家宴極歡而罷二月帝在鄴已巳擊毬於行宮之鞠場諸王弟從臣等供奉賜定州王都金鞍御馬鞠罷宴王都於武德殿之山亭宣教坊樂陳百戲俳優角觝夜漏一鼓方罷甲戌文思殿宴王都頒賜有異夜久方罷戊子宴於思政殿三月帝在鄴戊戌宴於內殿丙午帝擊毬於行宮之鞠場皇弟存霸皇子繼岌預焉毬罷宴於迎春殿 明宗天成二年秦王從榮自鄴中至帝幸其第宣禁中女伎及教坊樂歡宴至晚從榮進馬及銀器錢絹帝賜諸伎樂及行從人等乘輿歸內 四年潞王自河中入

觀進金銀錢絹開內宴壬午宴於長春殿

蕙田案五代史天成二年幸會節園羣臣買宴冊府元龜載羣臣共進錢絹請宴故秦王潞王均有金銀錢絹進也晉天福二年始停買宴錢

宋史太宗本紀雍熙二年庚戌重九召諸王宴射御苑中

禮志真宗景德四年二月甲申上御五鳳樓觀酺宗室近臣侍坐樓前露臺奏教坊樂後二日上復御樓賜宗室宴於都亭驛十月詔皇太子宗室赴玉宸殿翠芳亭觀稻賜宴仍以稻分賜之

大中祥符元年正月宴宗室於親王宮又宴宗室內職於都亭驛

職官志大中祥符元年有司上都亭驛醮宴位圖皇從
姪孫內殿崇班守節與從姪右衛將軍惟敘等同一班
上曰族子諸父安可同列乃命重行設位

真宗本紀大中祥符八年三月戊戌宴宗室射於苑中
七月丙子幸瑞聖園觀稼宴射於水心殿九月丁卯宴
宗室射於後苑

蕙田案此三宴得行葦詩義

天禧四年冬十月丙午召皇子宗室近臣玉宸殿觀稻
賜宴

仁宗本紀天聖八年三月壬申幸後苑遂宴太清樓八
月丁亥詔近臣宗室觀祖宗御書於龍圖天章閣又觀
瑞穀於元真殿遂宴藥珠殿

慶曆四年九月丁亥宴宗室太清樓射於苑中 五年

九月辛卯以重陽曲宴近臣宗室於太清樓遂射苑中
十一月丁亥冬至宴宗室於崇政殿 七年冬十月甲

子幸廣親宅謁太祖太宗神御殿宴宗室賜器幣有差
遼史聖宗本紀統和四年六月乙卯皇太妃諸王公主
迎上嶺表設御幄道傍置景宗御容率羣臣進酒陳俘
獲於前遂大宴

金史世宗本紀大定十六年正月辛未皇姑邀上至私
第諸妃皆從宴飲甚歡公主每進酒上立飲之 十七
年五月尚書省奏定皇家袒免以上親宴饗班次並從
唐制

禮志大定十七年詔以皇族袒免以上親雖無官爵封
邑若與宴當有班次禮官言案唐典皇家周親視三品
大功親小功尊屬視四品小功親總麻尊屬視五品總

麻袒免以上視六品上合以此制為班次

世宗本紀二十四年二月癸酉上曰朕將往上京念本朝風俗重端午節比及端午到上京則宴勞鄉閭宗室父老五月己丑至上京戊戌宴於皇武殿上謂宗戚曰朕思故鄉積有日矣今既至此可極歡飲君臣同之賜諸王妃主各有差宗戚皆霑醉起舞竟日乃罷

二十五年正月丁亥宴如嬪親王公主於光德殿宗室宗婦及五品以上命婦與坐者千七百餘人賞賚有差四月丁丑宴宗室宗婦於皇武殿大功親賜官三階小功二階總麻一階年高屬近者加宣武將軍及封宗女賜銀絹各有差曰朕尋常不飲酒今日甚欲沈醉此樂亦不易得也宗室婦女及羣臣故老以次起舞進酒上曰吾來數月未有一人歌本曲者吾為汝等歌之命宗

室子弟敘坐殿下者皆坐殿上聽上自歌其詞道王業之艱難及繼述之不易至慨想祖宗宛然如覩慷慨悲咽不能成聲歌畢泣下宗戚捧觴上壽皆稱萬歲於是諸夫人更歌本曲如私家之會既醉上復續調至一鼓乃罷

元史太宗本紀六年春會諸王宴射於斡兒寒河夏五月帝在達闐達葩之地大會諸王八年春正月諸王各治具來會宴萬安宮落成

明會典永樂六年令帝王生日先於宗廟具禮致祭然後序家人禮慶賀筵宴

右漢至明飲食之禮

書堯典克明俊德以親九族九族既睦平章百姓

博高祖元孫之親疏九族同出高祖皆當親之故言以親也禮記喪服小記云親親以三為五以五為九又異義夏侯歐陽等以為九族者父族四母族二妻族二皆據異姓有

服鄭元駁云異姓之服不過總麻言不廢昏又昏禮請期云惟是三族之不虞恐其廢昏明非外族也是鄭與孔同

皋陶謨惇敘九族傳厚次敘九族疏厚次敘九族

仲虺之誥志自滿九族乃離疏九族舉親以明疏也漢代儒者說九族有二案戴禮及尚書緯歐陽說九族此乃異姓有屬者父族四母族三妻族二古尚書說九族從高祖至元孫凡九族此九族亦謂高祖元孫之親也謂九族乃離實離之聖賢設言為戒容辭頗甚父子之閒便以志滿相棄此言九族

周禮春官小宗伯掌三族之別以辨親疏其正室皆謂之門子掌其政令注三族謂父子孫人屬之正名疏此三族謂父子孫一本而言推此而往其中則兼九族矣云辨親疏者據已上至高祖下至元孫傍至總麻重服者則親輕服者則疏也云正室皆謂之門子者還據九族之內但是適子正體主皆是正室亦謂之門子

儀禮士昏禮請期曰惟是三族之不虞使某也請吉日注三族謂父昆弟已昆弟子昆弟此三族者已及子皆為服期期則踰年欲及今之吉也

禮記仲尼燕居閨門之內有禮故三族和注三族父子孫也

喪服小記親親以三為五以五為九上殺下殺旁殺而親畢矣注已上親父下親子三也以父親祖以子親孫五也以祖親高祖以孫親元孫九也疏親親以三者父子并己為三加祖及孫言五以曾祖

爾雅釋親父為考母為妣注禮記云生曰父母妻死曰考妣嬪今世學考者從之案書曰大傷厥考心事厥考厥長聰九嬪之官明此非死生之異稱矣其義猶今謂兄為舅妹為媯即是此例父之考為王父父之妣為王母注加王考者尊之王父之考為曾祖王父之妣為曾祖母注曾猶重也曾祖王父之考為高祖王父之妣為高祖母注高者言最在上父之世父叔父

為從祖祖父父之世母叔母為從祖祖母注從祖而別世統異故父之

舅弟先生為世父後生為叔父注世有為嫡者嗣世統故也疏繼世以嫡長先生於父則繼世者也故曰世父說文叔作木許慎曰從上小言尊行之小也男子先生為兄後生為弟男子謂女子先生為姊後生為妹父之姊妹為姑父之從父舅弟為從祖父父之從祖舅弟為族父從祖父之子相謂為

五禮通考卷一百三十三 飲食禮

親高祖曾孫親元孫以四籠五故為九也然已上親父下親子合應云以一為三而云以三為五者父子一體無可分之義故祖親之說不須分矣而分祖孫非已一體故有可分之義而親名著也又以祖親曾祖以孫親曾孫應云以五為七而言九者曾祖曾孫為情已遠非已一體所親故略其相親之旨也庾氏云由祖以親曾高二祖由孫以親曾元二孫服之所向義由於此也

五禮通考卷一百三十三 飲食禮

從祖舅弟通解今本皆脫此句族父之子相謂為族舅弟族舅弟之

子相謂為親同姓注同姓之親無服屬疏禮記大傳云親者屬也鄭注

之外比諸同姓猶兄之子弟之子相謂為從父舅弟注從父

之子為孫注孫猶後也疏言繼後嗣也廣雅云孫順也孫之子為曾

孫注曾猶曾孫之子為元孫注元者言親屬微味也元孫之子為來孫注言

來之來孫之子為舅孫注舅後也及家竹書曰不密之弟孫疏釋言文東

孫字科斗文其字頭粗尾細似舅孫之子為仍孫注仍亦仍孫之子

為雲孫注言輕遠如浮雲王父之姊妹為王姑曾祖王父之姊妹

為曾祖王姑高祖王父之姊妹為高祖王姑父之從父

姊妹為從祖姑父之從祖姊妹為族祖姑父之從父舅

弟之母為從祖王母父之從祖舅弟之母為族祖王母

父之兄妻為世母父之弟妻為叔母父之從父舅弟之

妻為從祖母父之從祖舅弟之妻為族祖母父之從祖

祖父為族曾王父父之從祖祖母為族曾王母父之妾

為庶母祖王父也舅兄也注大江東人通言舅

路史親親者治之始也禮小記曰親親者以三為五

以五為九上殺下殺旁殺而親畢矣是所謂九族者

也夫人生則有父壯則有子父子與己此小宗三族

之別也父者子之祖因上推之以及於己之祖子者

父之孫因下推之以及於己之孫此禮傳之以三為

五也己之祖自己子視之則為曾祖王父自己孫視

之則為高祖王父己之孫自己父視之則為曾孫自

己祖視之則為元孫故又上推以及己之曾高下推

以及己之曾元是所謂以五為九也

陳氏禮記與詩序皆言九族特周禮小宗伯儀禮

士昏禮記仲尼燕居特言三族者三族父子孫也九

族者三族也

飲食禮

禮記

禮記

禮記

禮記

禮記

禮記

禮記

禮記

禮記

禮記

禮記

族高祖至元孫也三族舉其本九族極其末舉三族則九族見矣白虎通夏侯歐陽何琦如淳之徒以父族四母族三妻族二為九族其說蓋以詩之葛藟刺平王不親九族而言謂他人父謂他人母頰弁刺幽王不親九族而言豈伊異人兄弟甥舅角弓亦刺不親九族而言兄弟婚姻無胥遠矣則所謂九族者非特內宗而已是惡知詩人之所主者因內宗而發哉彼謂父族四者父之姓為一族父女昆弟適人者子為二族已女昆弟適人者子為三族已女適人者子為四族母族三者母之父母為一族母之昆弟為二族母之女昆弟為三族妻族二者妻之父為一族妻之母為二族然於母之父母則合而為一族妻之父母則離而為二可乎爾雅於內宗皆曰族於母妻曰

黨而已又禮小功之末可以嫁娶妻之黨固無妨於嫁娶昏禮不容慮其不虞也然則九族之說當從孔安國鄭康成為正何則小記曰親親以三為五以五為九上殺下殺旁殺而親畢矣此九族隆殺之差也蓋已上親父下親子三也以父親祖以子親孫五也以祖親曾高以孫親曾元九也然已之所親以一為三祖孫所親以五為九記不言者以父子一體而高元與曾同服故不辨異之也服父三年服祖期則曾祖宜大功高祖宜小功而皆齊衰三月者不敢以大功小功旁親之服加乎至尊故重其衰麻尊尊也減其日月恩殺也此所謂上殺服適子三年庶子朞適孫期庶孫大功適孫則長子在皆為庶孫也則曾孫宜五月而與元孫皆總麻三月者曾孫服曾祖三月曾祖報之亦

三月曾祖尊也故加齊衰曾孫卑也故服總麻此所謂下殺服祖朞則世叔宜大功以其與父一體故加以期從世叔則疎矣加所不及故服小功族世叔又疎矣故服總麻此發父而旁殺者也祖之兄弟小功曾祖兄弟總麻高祖兄弟無服此發祖而旁殺者也同父至親朞同祖爲從大功同曾祖爲再從小功同高祖爲三從總麻此發兄弟而旁殺者也父爲子朞兄弟之子宜九月不九月而朞者以其猶子而進之也從兄弟之子小功再從兄弟之子總麻此發子而旁殺者也祖爲孫大功兄弟之孫小功從兄弟之孫總麻此發孫而旁殺者也蓋服有加也有報也有降也祖之齊衰世叔從子之朞皆加也曾孫之三月與兄弟之孫五月皆報也若夫降有四品則非五服之

正禮耳

顧氏炎武日知錄宗盟之列先同姓而後異姓喪服之紀重本屬而輕外親此必有所受之不自周人始矣克明俊德以親九族孔傳以爲自高祖至元孫之親蓋本之喪服小記以三爲五以五爲九之說而百世不可易者也牧誓數商之罪但言昏棄厥遺王父母弟而不及外親呂刑申命有邦歷舉伯父伯兄仲叔季弟幼子童孫而不言甥舅古人所爲先後之序從可知矣故爾雅謂於內宗曰族於母妻則曰黨而昏禮及仲尼燕居三族之文康成並釋爲父子孫杜元凱乃謂外祖父外祖母從母子及妻父妻母姑之子姊妹之子女子之子非己之同族皆外親有服而異族者

左氏桓公六年傳注

五禮通考卷三百三

飲食禮

庚

親無乃顛倒之甚乎且九族之為同姓經傳之中有明證矣春秋魯成公十五年宋共公卒傳曰二華戴族也司城莊族也六官者皆桓族也共公距戴公九世凡十三公內除同世者四公而唐六典宗正卿掌皇九族之屬籍以別昭穆之序紀親疏之別九廟之子孫其族五十有九光皇帝一族景皇帝之族六元皇帝之族三高祖之族二十有一太宗之族十有三高宗之族六中宗之族四睿宗之族五此在元宗之時已有七族中睿二宗同為一若其歷世滋多則不止於九者而五世親盡故經文之言族者自九而止也杜氏於襄十一年傳注曰同族謂高祖以下則前說之非不待辨而明矣又孔氏正義謂高祖元孫無相及之理桓六不知高祖之兄弟與元孫之兄弟固可以相及如後魏國子博士李瑒之所謂壽有長短世有延促不可得而齊同

者如宋洪邁容齋隨筆言嗣濮王士歆在隆興為從叔祖在紹熙為曾叔祖在慶元為高叔祖其明證矣余丁未歲在大同遇代府中尉俊祈年近五十其世次於孝宗為昆弟而上距弘治之元已一百八十年秦晉二府現在者多其七八七世孫亦何必帝堯之世高祖元孫之族無一二人同在者乎疑其不相及而以外戚當之其亦昧於齊家治國之理矣

蕙田案九族馬鄭說是也陳氏顧氏辨尤詳明不可易

又案以上九族三族之義

宗元案九族之說自當以馬鄭解為當在此條內尤宜主同姓本族之九也若尚書以親九族則不必然蓋此句該盡修身齊家之道下文平章百姓則指國中民庶言協和萬邦

則指天下諸侯言故蔡傳於九族雖主馬鄭而仍包母族妻族在內始無漏義耳許氏謙亦謂但自高祖至元孫一以服斷則上殺下殺旁殺之餘外姓凡有服之親皆該在其中矣此說是也

又案母之父母合為一族者正所以加厚母族耳妻之父母則分為二只當母之一族而已其視母族不已殺而又殺乎

書禹貢錫土姓

傳天子建德因生以賜姓謂有德之人生此地以此地名賜姓曰姜左傳稱周賜陳胡公之姓曰嬌皆是因生賜姓之事也臣蒙賜姓其人少矣此事是用賢大者故舉以為言

詩周南麟趾麟之趾振振公子于嗟麟兮

麟之定振振公姓于嗟麟兮 傳公姓公同姓 疏公姓公同姓言同族傳云公族公同祖則謂與公同高祖有廟屬之親此同姓則五服以外故大傳云五世祖免被同姓是也大傳注又云外高祖為庶姓是同高祖為一節也此有

公于公族公姓對例為然案杜云不如我同父又曰不如我同姓傳曰同姓同祖此同姓同祖為異彼為一者以彼上云同父即云同姓同父之外次同祖更無異稱故為一也且皆對他人異姓不限遠近直舉祖父之同為親耳襄十一年左傳曰同姓於宗廟同宗於祖廟同族於禘廟又曰魯與諸姬臨於周廟謂同姓於文王為宗廟邢凡蔣茅昨祭臨於周公之廟是同宗於祖廟也同族謂五服之內彼自以五服之外遠近為宗姓與此又異此皆君親非異國也要皆同姓以對異姓異姓最為疎也

禮記大傳四世而總服之窮也五世祖免殺同姓也六

世親屬竭矣其庶姓別於上而戚單於下昏姻可以通

乎注問之也元孫之子姓別於高祖五世而無服姓世所由生繫之以姓而弗別綴之以食而

弗殊雖百世而昏姻不通者周道然也注姓正姓始祖為正姓高祖為庶姓繫之弗別

謂若今宗室屬籍也周禮小史掌定繫世辨昭穆 疏五世祖免殺同姓也者謂其承高祖之父者也言服祖免而無正服滅殺同姓也六世親屬竭矣者謂其承高祖之祖者也言不服祖免同姓而已庶姓別於上與高祖不同各為氏族不共高祖別自為宗是別於上也而戚單於下者戚親也單盡也謂四從兄弟恩親盡於下各自為宗不相尊敬庶眾也高祖以外人轉廣遠分姓眾多故曰庶姓也高祖以上復為五宗也問之者是記者以殷法而問周五世後昏姻可以通否元孫之子則四從兄弟承高祖父之後至已五世而無服各事小宗因字因官為氏不同高祖之父是庶姓別於上庶姓為眾姓也則氏族之謂也云姓世所由生者據五世無服不相稟承各為氏姓故云姓世所由生姓正姓者對氏族為正姓也云始祖為正姓者若炎帝姜黃帝姬周姓姬本於黃帝齊姓姜本於炎帝宋

姓子本於契是始祖為正姓也云高祖為庶姓者若魯之三桓慶父叔牙季友之後及鄭之七穆于游于國之後為游氏國氏之等云若今宗室屬籍也者以漢之同宗有屬籍則周家擊之以姓是也云小史掌定繫世者周禮

小史之官掌定帝繫世本知世昭穆故云定繫世辨昭穆也陳氏澠曰四世高祖也同高祖者服總麻服盡於此矣故曰服之窮也五世祖免謂其承高祖之父者相為祖免而已是減殺同姓也六世則共承高祖之祖者并祖免亦無矣故曰視屬竭也上指高祖以上也姓為正姓氏為庶姓故魯姬姓而三家各自為氏春秋諸國皆然是庶姓別異於上世也戚親也單盡也四從兄弟恩親已盡各自為宗是戚單於下也

蕙田案疏庶氏族之謂後世之姓多氏族也故夾漈云三代以後姓氏混而為一蓋源於此

春秋隱公八年左氏傳無駭卒羽父請諡與族公問族於眾仲眾仲對曰天子建德注立有德因生以賜姓注因其所由生

以賜姓謂若舜由媯汭故陳為媯姓疏陳世家云陳胡公滿者虞帝舜之後也音舜為庶人時居於媯汭其後因為氏姓媯氏武王克殷得媯滿封之於陳是舜由媯汭故陳為媯姓也案世本帝舜姚姓袁元年傳稱虞思妻少康以二姚是目舜以下猶姓姚也昭八年傳曰及胡公不淫故周賜之姓是胡公始姓媯耳史記以為胡公之胙之土而命之氏注報之以土而命氏曰陳疏胙訓報前已姓媯非也胙之土而命之氏注報之以土而命氏曰陳疏胙訓報前已姓媯非也

之國名以為之氏諸侯之氏則國名是也周語曰帝嘉馬德賜姓曰媯氏曰有夏昨四岳國賜姓曰姜氏曰有呂亦與賜姓曰媯命氏曰陳其事同也姓者生也以此為祖命之相生雖下及百世而此姓不改族者屬也與其子孫其相連屬其旁支別屬則各自立氏禮記大傳曰繫之以姓而弗別百世而昏姻不通者周道然也是言子孫當共姓也其上文云庶姓別於上而戚單於下是子孫當別氏也氏猶家也傳稱盟於子胥氏逐瘳狗入於華臣氏如此之類皆謂家為氏氏族一也所從言之異耳釋例曰別而稱之謂之氏名而言之則曰族例言別合者若宋之華元華喜皆出戴公向魚鱗蕩皆出桓公獨舉其人則云華氏向氏并指其宗則云戴族桓族是其別合之異也記謂之庶姓者以始祖為正姓高祖為庶姓亦氏族之別名也姓則受之于天子族則稟之于時君天下之廣兆民之眾非君所賜皆有族者人君之賜姓賜族此族之始祖耳其不賜者各從父之姓族非復人人賜也晉語稱黃帝之子二十五人其得姓者十二人天子之子尚不得姓況餘人哉固當從其父耳黃帝之子兄弟異姓周之子孫皆姓姬者古今不同質文代革周代尚文欲令子孫相親故不使別姓其賜姓者亦少惟外姓媯滿之徒耳賜族者有大功德宜世饗祀者方始賜之無大功德任其與衰者則不賜之不賜之者公之同姓蓋亦自氏祖字其異姓則有舊族可稱不世其祿不盡賜也眾仲以天子得封建諸侯故云胙土命氏據諸侯言耳其王朝大夫不封為國君者亦當王賜之族何則春秋之世有尹氏武氏之徒明亦天子賜與諸侯之臣義無異也此無駭是卿羽父為之請族蓋為卿乃賜族大夫以下或不賜也諸侯之臣卿為其極既登極位理合建家若其父祖微賤此人新升為卿以其位絕等倫其族不復因故身末被賜無族可稱晉挾鄭宛皆未賜族故單稱名也或身以才舉者升卿位功德猶薄未足立家則雖為卿竟不賜族羽父為無駭請族知其皆由時命非例得之也華督生立華氏知其恐慮不得故早求之也由此而言明有竟無族者魯之翬挾柔溺名見於經而其後無聞是或不得族也其士會之孛處秦者為劉氏伍員之子在齊為王孫氏外傳稱知果知伯之將滅自別其族為輔氏如此之類皆是身自為之非復君賜釋例曰子孫繁衍枝布葉分始承其本

未取異別故其流至於百姓萬姓其言自有百姓萬姓未必皆君賜也晉語稱炎帝姜則伯夷炎帝之後姜自是其本姓而云賜姓曰姜者黃帝之後別姓非一曰以姜姓賜伯夷使為一姓之祖耳非復諸侯以字注諸侯位卑不得賜姓因舊姓也猶后稷別姓不是因黃帝姓也

為諡因以為族

注或使即先人之諡稱以為族疏杜意諸侯以字言賜用先人所為之諡因以為族以諡為族者衛齊惡宋戴惡之類是也而劉君乃稱以諡為族全無一人妄規杜氏非其義也死後賜族乃是正法春秋之世亦有非禮生賜族者華督是也釋例曰舊說以為大夫有功德者則生賜族非也至於鄭祭仲為祭封人後升為卿經書祭仲以生賜族者檢傳既無同華氏之文則祭者是仲之舊氏也諸侯以字字有一等禮曰幼名冠字五十以伯仲周道也然則二十有加冠之字又有伯仲叔季為長幼之字二者皆可以為氏矣服虔曰公之母弟則以長幼為氏貴適統伯仲叔季是也庶公子則以配字為氏尊公族展氏臧氏是也祭鄭子人者鄭厲公之弟桓十四年鄭伯使其弟語來盟即其人也而其後為子人氏不以仲叔為氏則服虔之言公之母弟以長幼為氏其事未必然也杜以慶父叔牙與莊公異母自然仲叔叔非母弟族矣其或以二十之字或以長幼之字蓋出自時君之命也叔仲稱叔不稱孫而三桓皆稱孫俱氏長幼之字自不同也臧氏稱孫展氏不稱孫俱氏二十之字自不同也然則稱孫與不稱孫蓋出其家之意未必由君賜也以字為族者謂公之曾孫以王父之字為族也諸侯之子稱公子之子稱公孫公之常言非族也其或貶責則亦與族同稱公子之子稱公孫公之子稱公孫繫公之常言非族也其或貶責則亦與族同成十四年叔孫僑如齊逆女傳曰稱族尊君命也僑如以夫人婦姜氏至自齊傳曰舍族尊夫人也宣元年公子遂如齊逆女遂以夫人至事與僑如正同其傳直云尊君命尊夫人不言稱族舍族既非氏族則不待君賜自稱之矣至於公孫之子不復得稱公曾孫如無駭之輩直以名行及其死也則賜之族以其王父之字為族也此無駭是公之曾孫公之曾孫必須有族故據曾孫為文言以王父之字為族也此無駭是公之曾孫公之曾孫亦須有族者則叔孫得臣是也公子公孫於

身必無賜族之理經書季友仲遂叔辟者皆是以字配名通言之故杜注並云字也且漢伯姬者公子蕩之妻不可言公子伯姬故繫於夫字言蕩伯姬蕩非當時之氏其傳云立叔孫氏臧伯姬哀伯叔孫戴伯之徒皆傳家據後追言之耳其公孟疆世本以為靈公之子字公孟名疆與季友仲遂相似俱以字配名劉炫不達此旨妄規杜過非也必如劉解生賜族之文證在何處其公之曾孫元孫以外爰及異姓有新升為卿君賜之族蓋以此卿之字即為此族案世本末督是戴公之孫好父說之子華父是督之字計督是公孫耳未合賜族應死後其子官有乃賜族故杜云督未死而賜族督之妄也沈亦云督之子方可有族耳

世功則有官族邑亦如之

注謂取其舊官舊邑之稱以為族皆稟之魏趙氏非是君賜則不得族嫌其居官邑不待公命故云皆稟之時君此謂同姓異姓皆然也服虔止謂異姓又引宋司城韓魏為證韓與司城非異姓司城又自為樂氏不以司城為族也

公命以字為展氏 注諸侯之子稱公子之子稱公孫公故為展氏

顧氏棟高春秋大夫無生而賜氏論案春秋公之子稱公子之子稱公孫公孫之子以王父字為氏此定制也而胡文定於僖十六年季友卒發傳云魯之大夫有生而賜氏者若季友仲遂是也蓋季友於僖有擁戴之功仲遂於宣有援立之恩二君報之故生而賜氏俾世為卿春秋於此特書以志壞法亂紀之始謹履霜之戒其論甚正而其實不然三家稱仲孫叔孫季孫氏未嘗單舉仲叔季也莊三十二年傳立叔孫氏未嘗云立叔氏其有稱叔氏者則另為一族宣公弟叔辟之後經所稱叔弓叔鞅叔輒是也論語孟孫問孝於我檀弓云此季孫之賜也俱有孫字若生而賜為季氏則其子孫如季孫行父季孫宿季孫意如當云季行父季宿季意如矣何以復多贅一孫字乎且叔氏與叔孫氏又何分別也以是知季友賜氏之說非也仲遂之仲本是行次若已賜為仲氏

則其子歸父當稱仲歸父不當便稱公孫歸父公孫者未賜族之稱也況遂父
子止稱東門氏不稱仲氏宣十八年傳有遂遂東門氏可證至仲嬰齊乃更受
賜仲氏耳以是知仲遂賜氏之說非也蓋季友卒時尚不氏曰季至其孫行父
始以王父字氏曰季孫不可以孫而彊誣其祖襄二十三年外史盟曰母或如
東門遂云云若仲氏果宣公所賜此係國之重典昭章耳目外史必不易其稱
謂而曰東門氏杜於仲嬰齊卒註云嬰齊襄仲子宣十八年遂東門氏既而使
嬰齊紹其後曰仲氏是則仲之有氏至嬰齊始受君賜以前止曰東門與仲無
與而文定以為宣公生而賜為仲氏豈不誤哉夫因其子孫而罪其祖父并罪
其祖父當日之君以莫須有之事遂為一
成不可變之獄此則宋儒刻論之過也

蕙田案注疏論姓氏族極詳

國語晉語傳曰黃帝之子二十五人其同姓者二人而

已唯青陽與夷鼓皆為己姓注此二人相與同德故俱為己姓青陽金天氏帝少暎也青陽方

雷氏之甥也夷鼓形魚氏之甥也注方雷西陵氏之姓形魚國名帝繫曰黃帝娶於西陵氏之子

其同生而異姓者四母之子別為十二姓曰嫫祖實生青陽姊妹之子曰嫫

凡黃帝之子二十五宗其得姓者十四人為十二姓注得姓以

是也唯青陽與蒼林氏同於黃帝故皆為姬姓注二十五宗德居官而賜之姓也謂十四人而二人為姬二人為己故十二姓

姬酉祁己滕箴任荀僖姁偃依注二十五宗

林德及黃帝同姓為姬姓

春秋文公十八年左氏傳昔高陽氏有才子八人蒼舒
隕鼓檇鼓大臨危降庭堅仲容叔達齊聖廣淵明允篤
誠天下之民謂之八愷高辛氏有才子八人伯奮仲堪
叔獻季仲伯虎仲熊叔豹季狸忠肅共懿宣慈惠和天
下之民謂之八元此十六族也世濟其美不隕其名以
至於堯堯不能舉舜臣堯舉八愷使主后土以揆百事
莫不時序地平天成舉八元使布五教於四方父義母
慈兄友弟共子孝內平外成昔帝鴻氏有不才子掩義
隱賊好行凶德醜類惡物頑嚚不友是與比周天下之
民謂之渾敦少暎氏有不才子毀信廢忠崇飾惡言清
譖庸回服讒蒐慝以誣盛德天下之民謂之窮奇顛頑
氏有不才子不可教訓不知話言告之則頑舍之則嚚

通鑑卷一百二十三 飲食禮

三

傲狠明德以亂天常天下之民謂之禱杙此三族也世濟其凶增其惡名以至於堯堯不能去縉雲氏有不才子貪於飲食冒於貨賄侵欲崇侈不可盈厭聚斂積實不知紀極不分孤寡不恤窮匱天下之民以比三凶謂之饕餮舜臣堯賓于四門流四凶族渚窮奇禱杙饕餮投諸四裔以禦魑魅是以堯崩而天下如一同心戴舜以為天子以其舉十六相去四凶也

通考馬氏曰八愷出自高陽八元出自高辛驩兜出自帝鴻共工出自少皞鯀出自顓頊皆黃帝之裔也雖賢否不同而皆以帝者子孫為顯官於唐虞之世蓋古之仕者世祿而五帝三代之世系未有不出自黃帝者故敘此段以備唐虞以來公族世系之本末云

襄公十二年左氏傳吳子壽夢卒臨於周廟禮也注周廟也周公出文王故魯立其廟

凡諸侯之喪異姓臨於外注於城外同姓於宗

廟注所出王之廟同宗於祖廟注始封君之廟同族於禰廟注父廟也同族謂高祖以下是故

魯為諸姬臨於周廟為邢凡蔣茅胙祭臨於周公之廟注即祖廟也六國皆周公之支子別封為國其祖周公

家語衛公使其大夫求婚於季氏桓子問禮於孔子子曰同姓為宗有合族之義故繫之以姓而弗別綴之以食而弗殊雖百世婚姻不得通周道然也桓子曰魯衛之先雖寡兄弟今已絕遠矣可乎孔子曰固非禮也夫上治祖禰以尊尊也下治子孫以親親也旁治昆弟所以敦睦也此先王不易之教也

百虎通人所以有姓者何所以崇恩愛厚親親遠禽獸別婚姻也故禮別類使生相愛死相哀同姓不得

相娶者皆爲重人倫也姓生也人所稟天氣所以生者也所以有氏者何所以貴功德賤伎力或氏其官或氏其事聞其氏即可知其德所以勉人爲善也或氏王父字何所以別諸侯之後爲與滅國繼絕世也諸侯之子稱公子公子之子稱公孫公孫之子各以其王父字爲氏故魯有仲孫季孫叔孫楚有昭屈景齊有高國崔也

陳氏禮書姓非天子不可以賜而氏非諸侯不可以命姓所以繫百世之正統氏所以別子孫之旁出族則氏之所聚而已然氏亦可以謂之姓故大傳言繫之以姓又言庶姓別於上則氏庶姓一也氏又可以謂之族故羽父爲無駭請族隱公命以爲展氏則氏族一也蓋別姓則爲氏卽氏則有族族無不同氏氏

有不同族故八元八愷出於高陽氏高辛氏而謂之十六族是氏有不同族也商氏條氏徐氏之類謂之六族陶氏施氏之類謂之七族宋之華氏謂之戴族向氏謂之桓族是族無不同氏也古者或氏於國則齊魯秦吳氏於諡則文武成宣氏於官則司馬司徒氏於爵則王孫公孫氏於字則孟孫叔孫氏於居則東門北郭氏於志則三烏五鹿氏於事則巫乙匠陶而受姓命氏粲然眾矣

鄭氏樵通志氏族略序凡言姓氏者皆本世本公子譜二書二書皆本左傳然左氏所明者因生賜姓胙土命氏及以字以諡以官以邑五者而已今則不然論得姓受氏者有三十二類左氏之言隘矣一曰以國爲氏二曰以邑爲氏天子諸侯建國故以國爲氏

虞夏商周魯衛齊宋之類是也卿大夫立邑故以邑
爲氏崔盧鮑曼臧費柳楊之類是也三曰以鄉爲氏
四曰以亭爲氏五等之封降國侯而爲邑侯降邑侯
而爲關內侯降關內侯而爲鄉侯降鄉侯而爲亭侯
關內邑者溫原蘇毛甘樊祭尹之類是也裴陸龐閻
之類封於鄉者故以鄉氏麋采歐陽之類封於亭者
故以亭氏五曰以地爲氏有封土者以封土命氏無
封土者以地居命氏居傅巖者爲傅氏徙嵇山者爲
嵇氏主東蒙之祀則爲蒙氏守橋山之冢則爲橋氏
彤氏因彤班食於彤門潁氏因考叔爲潁谷封人東
門襄仲爲東門氏桐門右師爲桐門氏也隱逸之人
居於祿里者爲祿里氏居於綺里者爲綺里氏美也
優倡之人居於社南者爲社南氏居於社北者爲社

北氏賤也又如介之推燭之武未必亡氏由國人所
取信也故特標其地以異於眾也六曰以姓爲氏姓
與地之爲氏其初皆因所居而命得賜者爲姓不得
賜者爲地居於姚墟者賜以姚居於贏濱者賜以贏
姬之得賜居於姬水故也姜之得賜居於姜水故也
故曰因生以賜姓七曰以字爲氏八曰以名爲氏九
曰以次爲氏凡諸侯之子稱公子公子之子稱公孫
公孫之子不可復言公孫則以王父字爲氏如鄭穆
公之子曰公子駢字子駟其子曰公孫夏其孫則曰
駟帶駟乞宋桓公之子曰公子目夷字子魚其子曰
公孫友其孫則曰魚莒魚石此之謂以王父字爲氏
無字者則以名魯孝公之子曰公子展其子曰公孫
夷伯其孫則曰展無駭展禽鄭穆公之子曰公子豐

其子曰公孫段其孫則曰豐卷豐施此諸侯之子也
天子之子亦然王子狐之後為狐氏王子朝之後為
朝氏是也無字者以名然亦有不以字而以名者如
樊皮字子仲其後以皮為氏伍員字子胥其後以員
為氏皆由以名行故也亦有不以王父字為氏而以
父字為氏者如公子遂之子曰公孫歸父字子家其
後為子家氏是也又如公孫枝字子桑其後為子桑
氏者亦是也亦有不以王父名為氏而以父名為氏
者如公子牙之子曰公孫茲字戴伯其後為茲氏是
也又如季公鉏字子彌其後為公鉏氏者亦是也以
次為氏者長幼之次也伯仲叔季之類是也次亦為
字人生其始也皆以長幼呼及乎往來既多交親稍
眾則長幼有不勝呼然後命字焉長幼之次可行於

家里而已此次與字之別也所以魯國三家皆以次
命氏而亦謂之字焉十曰以族為氏左傳云為諡因
以為族楚辭云昭屈景楚之三族也昭氏景氏則以
諡為族也屈氏者因王子瑕食邑於屈初不因諡則
知為族之道多矣不可專言諡也族近於次族者氏
之別也以親別疎以小別大以異別同以彼別此孟
氏仲氏以兄弟別也伯氏叔氏以長少別也丁氏癸
氏以先後別也祖氏禰氏以上下別也第五氏第八
氏同居之別也南公氏南伯氏同禰之別也孔氏子
孔氏旗氏子旗氏字之別也軒氏軒轅氏熊氏熊相
氏名之別也季氏之有季孫氏仲氏之有仲孫氏叔
氏之有叔孫氏適庶之別也韓氏之有韓餘氏傅氏
之有傅餘氏梁氏之有梁餘氏餘子之別也遂人之

族分而爲四商人之族分而爲七此枝分之別也齊有五王合而爲一謂之五王氏楚有列宗合而爲一謂之列宗氏此同條之別也公孫歸父字子家襄仲之子也歸父有二子一以王父字襄仲爲仲氏一以父字子家爲子家氏公子郢字子南其後爲子南氏而復有子郢氏伏羲之後有伏處二氏同音異文共叔段之後有共氏又有叔氏又有段氏凡此類無非辨族十一曰以官爲氏十二曰以爵爲氏有官者以官無官者以爵如周公之兄弟也周公爲太宰康叔爲司寇聃季爲司空是皆有才能可任以官者也五叔無官是皆無才能不可任以官者也然文王之子武王周公之兄弟雖曰無官而未嘗無爵士如此之類乃氏以爵也以官爲氏者太史太師司馬司空之

類是也雲氏庾氏籍氏錢氏之類亦是也以爵爲氏者皇王公侯是也公乘公士不更庶長亦是也十三曰以凶德爲氏十四曰以吉德爲氏此不論官爵惟以善惡顯著者爲之以吉德爲氏者如趙衰人愛之如冬日其後爲冬日氏古者賢人爲人所尊尚號爲老成子其後爲老成氏以凶德爲氏者如英布被黥爲黥氏楊元感梟首爲梟氏齊武惡巴東王蕭子響爲同姓故改蕭爲峭後魏惡安樂王元鑒爲同姓故改元爲兀十五曰以技爲氏此不論行而論能巫者之後爲巫氏屠者之後爲屠氏卜人之後爲卜氏匠人之後爲匠氏以至豢龍爲氏御龍爲氏干將爲氏烏浴爲氏者亦莫不然十六曰以事爲氏此又不論行能但因其事而命之耳夏后遭有窮之難后緡方

娠逃出自竇而生少康支孫以竇爲氏漢武帝時田
千秋爲丞相以年老詔乘小車出入省中時號車丞
相其後因以車爲氏微子乘白馬朝周茲白馬氏之
所始也魏初平中有隱者常乘青牛號青牛先生茲
青牛氏之所始也十七日以諡爲氏周人以諱事神
諡法所由立生有爵死有諡貴者之事也莊氏出於
楚莊王僖氏出於魯僖公康氏者衛康叔之後也宣
氏者魯宣伯之後也文氏武氏哀氏繆氏之類皆氏
於諡者也凡複姓者所以明族也一字足以明此不
足以明彼故益一字然後見分族之義言王氏則濫
矣本其所系而言則有王叔氏王孫氏言公氏則濫
矣本其所系而言則有公子氏公孫氏故十八日以
爵系爲氏唐氏雖出於堯而唐孫氏又爲堯之別族

滕氏雖出於叔繡而滕叔氏又爲叔繡之別族故十
九日以國系爲氏季友之後傳家則稱季孫不傳家
則去孫稱季叔牙之後傳家則稱叔孫不傳家則去
孫稱叔故二十日以族系爲氏士季者字也有士氏
又別出爲士季氏伍參者名也有伍氏又別出爲伍
參氏此以名氏爲氏者也又有如韓嬰者本出韓國
加國以名爲韓嬰氏如臧會者本出臧邑加邑以名
爲臧會氏如屠住者本出住鄉加鄉以名爲屠住氏
故二十一日以名氏爲氏而國邑鄉附焉禹之後爲
夏氏杞他奔魯受爵爲侯又有夏侯氏出焉媯姓之
國爲息氏公子邊受爵爲大夫又有息夫氏出焉此
以國爵爲氏者也白氏舊國也楚人取而邑之以其
後爲白侯氏故二十二日以國爵爲氏而邑爵附焉

原氏以周邑而得氏申氏以楚邑而得氏及平原加伯爲原伯氏以別於原氏申加叔爲申叔氏以別於申氏是之謂以邑系爲氏魯有沂邑因沂大夫相魯而以沂相爲氏周有甘邑因甘平公爲王卿士而以甘士爲氏故二十三曰以邑系爲氏而邑官附焉師氏者太師氏也史氏者太史氏也師延之後爲師延氏史晁之後爲史晁氏此以名隸官是之謂以官名爲氏呂不韋爲秦相子孫爲呂相氏酈食其之後爲食其氏曾孫武爲侍中改爲侍其氏此以官氏爲氏者也故二十四曰以官名爲氏而官氏附焉以諡爲氏所以別族也邑而加諡如苦成子之後爲苦成氏臧文仲之後爲臧文氏氏而加諡者如楚釐子之後爲釐子氏鄭其叔之後爲其叔氏爵而加諡者如衛

成公之後爲成公氏楚成王之後爲成王氏故二十五曰以邑諡爲氏二十六曰以諡氏爲氏二十七曰以爵諡爲氏也二十八曰代北複姓二十九曰關西複姓三十曰諸方複姓三十一曰代北三字姓也三十二曰代北四字姓此外則有四聲又有複姓四聲者以氏族不得其所系之本乃分爲四聲以統之複姓者以諸有複姓而不得其所系之本者此附四聲之後氏族之道終焉

又曰三代之前姓氏分而爲二男子稱氏婦人稱姓氏以別貴賤貴者有氏賤者有名無氏故姓可呼爲氏氏不可呼爲姓姓所以別婚姻故有同姓異姓庶姓之別氏同姓不同者婚姻可通姓同氏不同者婚姻不可通三代之後姓氏合而爲一皆所以別婚姻

而以地望明貴賤於文女生爲姓故姓之字多從女如姬姜嬴姒嬀媯媯媯始姪媯之類是也五帝之前無帝號有國者不稱國惟以名爲氏所謂無懷氏葛天氏伏羲氏燧人氏者也至神農氏軒轅氏雖曰炎帝黃帝而猶以名爲氏然不稱國至二帝而後國號唐虞也夏商因之雖有國號而天子世世稱名至周而後諱名用諡由是氏族之道生焉最明著者春秋之時也春秋之時諸侯稱國未嘗稱氏惟楚國之君世稱熊氏荆蠻之道也支庶稱氏未嘗稱國或適他國則稱國如宋公子朝在衛則稱宋朝衛公孫鞅在秦則稱衛鞅是也秦滅六國子孫皆爲民庶或以國爲氏或以姓爲氏或以氏爲氏姓氏之失自此始故楚之子孫可稱楚亦可稱芊周之子孫可稱周子南

君亦可稱姬嘉又如姚恢改姓爲嬀嬀皓改姓爲姚茲姓與氏混而爲一者也

顧氏炎武亭林集原姓男子稱氏女子稱姓氏一再傳而可變姓千萬年而不變最貴者國君國君無氏不稱氏稱國踐土之盟其載書曰晉重魯申衛武蔡甲午鄭捷齊潘宋王臣莒期荀偃之稱齊環衛太子之稱鄭勝晉午是也次則公子公子無氏不稱氏稱公子公子彊公子益師是也最下者庶人庶人無氏不稱氏稱名然則氏之所由興其在於卿大夫乎故曰諸侯之子爲公子公子之子爲公孫公孫之子以王父字若諡若邑若官爲氏氏焉者類族也貴貴也考之於傳二百五十五年之間有男子而稱姓者乎無有也女子則稱姓古者男女異長在室也稱姓冠

之以序叔隗季隗之類是也已嫁也於國君則稱姓冠之以國江芊息媯之類是也於大夫則稱姓冠以大夫之氏趙姬盧蒲姜之類是也在彼國之人稱之或冠以所自出之國若氏驪姬梁嬴之於晉顏懿姬驪聲姬之於齊是也既卒也稱姓冠之以諡成風敬嬴之類是也亦有無諡而仍其在室之稱仲子少姜之類是也范氏之先自虞以上為陶唐氏在夏為御龍氏在商為豕韋氏在周為唐杜氏士會之帑處秦者為劉氏夫槩王奔楚為堂谿氏伍員屬其子於齊為王孫氏智果別族於太史為輔氏故曰氏可變也孟孫氏小宗之別為子服氏為南宮氏叔孫氏小宗之別為叔仲氏季孫氏之支子曰季公鳥季公亥季寤稱季不稱孫故曰貴貴也魯昭公娶於吳為同姓

謂之吳孟子崔武子欲娶棠姜東郭偃曰男女辨姓今君出自丁臣出自桓不可夫崔之與東郭氏異昭公之與夷昧代遠然同姓百世而婚姻不通者周道也故曰姓不變也是故氏焉者所以為男別也姓焉者所以為女坊也自秦以後之人以氏為姓以姓稱男而周制亡而族類亂作原姓

顧氏棟高春秋列國姓氏表序氏族之學至唐而極精亦至唐而極亂一亂於朝廷之賜姓再亂於支孽之冒姓三亂於外裔之入中國因蕃落以起姓何則自漢初已有賜項伯為劉纏賜婁敬為劉敬至唐而如李勣之徒不知其幾矣而青以鄭季之子而冒姓衛氏曹操以夏侯氏之子而冒姓曹氏至唐而如楊國忠之徒不印其幾矣金日磾以休屠王太子而姓金氏劉元海以呼韓邪之後而姓劉氏至唐而侯莫陳之為侯烏石闕之為石又不知其幾矣唐太宗既有天下以地望明貴賤特詔高士廉岑文本之屬著姓氏譜先列天家次列后族及宰相凡長孫宇文皆登貴姓而於生民之初得姓受氏之由源委不可得而辨也善乎先儒史伯璠之論曰三代以後皆無所謂姓只有氏而已故後世但曰姓某氏而不敢曰某姓某氏蓋姓不可考故得虛其姓於氏之上而實其氏於下亮哉言乎愚謂欲考姓氏之分斷須以左氏為樞紐蓋盤古燧人之初未始有姓也至庖犧得風姓炎帝得姜姓黃帝得姬姓帝堯以伊祁而為祁舜以媯而為媯姓至三代迭王延及春秋之初分封之國存百有二十四稽其姓合中國與鄭媯姬姜子如風祁媯姑任嬴己偃姁曹芊熊曼歸隗允漆僅及

二十有一是時諸侯之國公子公孫支分派別列官分職世有掌司因以命氏而小國之卿大夫名字不列於經傳無可考者居十之九焉最著者姬姓則有周魯鄭衛姜姓則有齊子姓則有宋姬姓則有越與杞鄆芊姓則有楚其公族之析為氏者班班可考又陳媯姓自陳敬仲奔齊而為陳氏晉之范本祁姓士會封於范而為范氏其在秦者為劉氏吳夫槩奔楚為堂谿氏伍員屬其子於齊為王孫氏尤大彰明較著者也又春秋重世卿為之立後則置氏不必公族盡皆有氏也故春秋之初魯之翬挾柔溺鄭之宛齊之年皆無氏逮其後有沒而立氏者莊公季年立叔孫氏是也有邀鄰國以立之如四國為賂故立華氏也

鄭氏樵通志自隋唐而上官有簿狀家有譜系官之選舉必由於簿狀家之婚姻必由於譜系歷代並有圖譜局置郎令史以掌之仍用博通古今之儒知撰譜事凡百官族姓之有家狀者則上之官為考定詳實藏於秘閣副在左戶若私書有濫則糾之以官籍官籍不及則稽之以私書此近古之制以繩天下使貴有常尊賤有等威者也姓氏之學最盛於唐而國姓無定論林寶作元和姓纂而百姓不知所由來漢

有鄧氏官譜應劭有氏族篇又有潁川太守聊氏萬姓譜魏立九品置中正州大中正主簿郡中正功曹各有簿狀以備選舉晉宋齊梁因之故晉散騎常侍賈弼太保王宏齊衛將軍王儉梁北中郎諮議參軍知撰譜事王僧儒之徒各有百家譜徐勉又有百官譜宋何承天撰姓苑與後魏河南官氏志此二書尤為姓氏家所宗唐太宗命諸儒撰氏族志一百卷柳沖撰大唐姓系錄二百卷路洳有衣冠譜韋述有開元譜柳芳有永泰譜柳璨有韻略張九齡有韻譜林寶有姓纂邵思有姓解其書雖多大槩有三種一種論地望一種論聲一種論字論字者則以偏旁為主論聲者則以四聲為主論地望者則以貴賤為主然貴賤升沈何常之有安得專主地望以偏旁為主者

可以為字書以四聲為主者可以為韻書此皆無與於姓氏

蕙田案姓者因於生而受賜者也氏者分於姓而辨族者也族者本乎姓氏而別宗者也姓原於上古而少氏分於中古而多族淆於後世而雜氏本乎姓氏著而姓晦氏分為族族私而氏公故古者論氏後世論族而已書曰錫士姓左傳曰賜姓命氏前人論之詳矣大傳曰庶姓別於上故氏亦曰姓今之所謂姓者皆氏也即庶姓也善乎陳用之之言曰別姓則為氏即氏則有族族無不同氏氏有不同族盡之矣故曰古者論氏後世辨族辨族則譜系之學不可不講也

右族姓氏

五禮通考卷第一百四十三

五禮通考卷第一百四十四

內廷儀禮部右侍郎金廣泰薦用編輯

李保德總纂纂部御桐城方觀承同訂

嘉禮十七

飲食禮

禮記文王世子庶子之正于公族者教之以孝弟睦友

子愛明父子之義長幼之序注正者政也庶子司馬之屬其朝於

公內朝則東面北上臣有貴者以齒其在外朝則以官

司士為之其在宗廟之中則如外朝之位宗人授事以

爵以官其登餽獻受爵則以上嗣庶子治之雖有三命

不踰父兄疏此句應承前文臣有貴者以齒之下其外朝既云司士為之則內

其公大事則以喪服之精麤為序雖于公族之喪亦如

之以次主人

其在軍則守於公禴注謂從軍者公禴行主也行公若有出疆之政庶子以公族之無事者守於公宮正室守大廟諸父守貴宮貴室諸子諸孫守下宮下室

五廟之孫祖廟未毀雖為庶人冠取妻必告死必赴練祥則告族之相為也宜弔不弔宜免不免有司罰之至於賄賂承含皆有正焉公族其有死罪則磬於甸人其刑罪則織剝亦告於甸人公族無宮刑獄成有司讞於公其死罪則曰某之罪在大辟其刑罪則曰某之罪在小辟公曰宥之有司又曰在辟公又曰宥之有司又曰在辟及三宥不對走出致刑於甸人公又使人追之曰雖然必赦之有司對曰無及也反命於公公素服不舉為之變如其倫之喪無服注素服於凶事為吉於吉事為凶非喪服也君雖不服臣卿大夫死則皮弁錫衰以居往弔當事則弁絰於士蓋疑衰同姓則總衰以弔之親哭之注不往弔為位今無服者不往弔也倫謂親疎之比也素服亦皮弁矣

臣使有司哭之

公族朝於內朝內親也雖有貴者以齒所父子也外朝以官體異姓也宗廟之中以爵為位崇德也宗人授事以官尊賢也登饗受爵以上嗣尊祖之道也喪紀以服之輕重為序不奪人親也戰則守於公禴孝愛之深也正室守太廟尊宗室而君臣之道著矣諸父諸兄守貴室子弟守下室而讓道達矣五廟之孫祖廟未毀雖及庶人冠取妻必告死必赴不忘親也親未絕而列於庶人賤無能也敬弔臨賄賂睦友之道也古者庶子之官治而邦國有倫邦國有倫而眾鄉方矣公族之罪雖親不以犯有司正術也所以體百姓也刑於隱者不與國人慮兄弟也弗弔弗為服哭於異姓之廟為忝祖遠之也疏為其犯罪忝辱先祖於公法合疎遠之也素服居外不聽樂私喪之也骨肉之

親無絕也公族無官刑不翦其類也

宣公二年左氏傳晉驪姬之亂詛無畜羣公子

注詛謂毒言

姬與獻公及諸大夫詛無畜羣公子欲令其二子專國杜雖不注義似不然若驪姬身為此詛姬死即應復常何得比至於今國無公族蓋為奚齊卓子以庶篡適晉國創其為亂不用復畜公子案檢傳文及國語文公之子雍在秦樂在陳黑自

是晉無公族

注無公子故廢公族之官 疏公族之官掌教公之子弟孔晁

及成公即位乃宦卿之適而為之田以為公族

注宦仕也為置

田邑以為

又宦其餘子亦為餘子

注餘子適子之母弟也亦治餘子之政 疏下庶子為妾子知餘子

則是適子之母弟也言亦為餘子則知餘子之官亦治餘子之政令主教卿大夫適妻之次子也下云庶子為公行不云教庶子然則卿大夫之妾子亦是餘子之

其庶子為公行

注庶子妾子也掌率公戎行 疏下文 晉於是

公族餘子公行

皆官名

國語晉語欒伯請公族大夫

欒伯欒武子公族大夫掌公族與卿之子弟

公曰荀家

惇惠

荀家晉大夫

荀會文敏

荀會荀家之族

驥也果敢

驥欒書之子桓子

無忌鎮靜

無忌韓厥之子公族穆子 使茲四人者為之夫膏梁之性難正也故使惇

惠者教之使文敏者導之使果敢者諭之使鎮靜者修之惇惠者教之則徧而不倦文敏者導之則婉而入果敢者諭之則過而不隱鎮靜者修之則壹使茲四人者為公族大夫

孔叢子雜訓魯人有同姓死而弗弔者人曰在禮當

免不免當弔不弔有司罰之如之何子之無弔也答

曰吾以其疎遠也子思聞之曰無恩之甚也昔者季

孫問於夫子曰百世之宗有絕道乎子曰繼之以姓

義無絕也故同姓為宗合族為屬雖國子之尊不廢

其親所以崇愛也是以繼之以食序列昭穆萬世婚

姻不通忠篤之道然也

右正公族

文獻通考秦商鞅立法宗室非有軍功不得論為屬籍

漢書高帝本紀七年置宗正官以敘九族
文帝本紀四年復諸劉有屬籍家無所與賜諸侯王子
邑各二千戶

武帝本紀元光元年復七國宗室前絕屬者

馬氏曰孝景三年詔楚元王子執等與吳王濞等為
逆朕不忍加法除其籍毋令汚宗室是年始詔復之

後元二年正月朝諸侯王於甘泉宮賜宗室

昭帝本紀始元二年以宗室毋在位者舉茂材劉辟疆
劉長樂皆為光祿大夫辟疆守長樂衛尉

宣帝本紀地節元年詔曰朕聞堯親九族以和萬國朕
蒙遺德奉承聖業惟念宗室屬未盡而以罪絕若有遺
材改行勸善其復屬使得自新

成帝本紀建始二年罷太子博望苑以賜宗室朝請者

漢書劉向傳上封事言王氏一姓朱輪華轂者二十
三人大將軍秉事用權五侯驕奢排擯宗室孤弱公
族其有智能者尤非毀而不進遠絕宗室之任不令
得給事朝省恐其與己分權事勢不兩大王氏與劉
氏且不並立宜發明詔吐德音接近宗室親而納信
黜遠外戚毋授以政所以褒睦內外之姓子孫無疆
之計也

哀帝本紀即位賜宗室王子有屬者馬各一駟

平帝本紀元始元年詔宗室屬未盡而以罪絕者復其
屬其為吏舉廉佐史補四百石

師古曰宗室為吏者皆令舉廉各
從本秩而依廉吏遷之為佐史者

四年二月賜宗室有屬籍者爵自五大夫以上各有差
五年正月祫祭明堂宗室子九百餘人徵助祭禮畢皆

益戶賜爵及金帛增秩補吏各有差詔曰蓋聞帝王以德撫民其次親親以相及也昔堯睦九族舜惇敘之朕以皇帝幼年且統國政惟宗室子皆太祖高皇帝子孫及兄弟吳頌楚元之後漢元至今十有餘萬人雖有王侯之屬莫能相糾或陷入刑罪教訓不至之咎也傳不云乎君子篤於親則民興於仁其為宗室自太上皇以來族親各以世氏郡國置宗師以糾之致教訓焉二千石選有德義者以為宗師考察不從教令有寃失職者宗師得因郵亭書言宗伯請以間常以歲正月賜宗師帛各十匹

後漢書光武帝紀建武二年十二月戊午詔曰惟宗室列侯為王莽所廢先靈無所依歸朕甚愍之其並復故國若侯身已歿屬所上其子孫見名尚書封拜

十三年二月丙辰詔曰長沙王興真定王得河間王邵中山王茂皆襲爵為王不應經義其以興為臨湘侯得為真定侯邵為樂成侯茂為單父侯其宗室及絕國封侯者凡一百三十七人丁巳降趙王良為趙公太原王章為齊公魯王興為魯公

文獻通考漢置宗正卿掌序錄王國嫡庶之次及諸宗親屬遠近郡國歲因計上宗室名籍若有犯法當髡以上先上諸宗正宗正以間乃報決

胡廣曰又歲一治諸王世譜差序秩

後漢書和帝本紀元興元年宗室以罪絕者悉復屬籍文獻通考魏文帝黃初二年制封王之庶子為鄉公嗣王之庶子為亭侯公之庶子為亭伯

明帝太和五年詔令諸王及宗室公侯各將適子一人朝

齊王時宗室曹罔上書曰大魏之興二十四年矣子弟王空虛之地君有不使之民宗室竄於閭閻不聞邦國之政權均匹夫勢齊凡庶內無深根不拔之固外無盤石宗盟之助非所以安社稷爲萬世之業也且今之州牧郡守古之方伯諸侯皆跨有千里之士兼軍武之任或比國數人或兄弟並據而宗室子弟曾無一人廁其間與相維制非所以強幹弱枝備萬一之虞也今之用賢超爲名都之主或爲偏師之帥而宗室有文者必限之小縣之宰有武者必置於百人之上非所以勸進賢能褒異宗室之禮也語曰百足之蟲至死不僵以其扶之者眾也此言雖小可以譬大是以聖王安不忘危存不忘亡故天下有變而無傾危之患矣冀以此論感悟曹爽爽不能用

晉武帝懲魏氏孤立之敝故大封宗室授以職任又詔諸王皆得自選國中長吏衛將軍齊王攸獨不敢皆令上請又詔除魏宗室禁錮

晉置宗正統皇族家人圖牒

孝武制帝室替親官非祿官者月給錢十萬

梁置宗正卿位視列曹尙書主皇室外戚之籍以宗室爲之

後魏明帝時京兆王遙大功昆弟皆是景穆之孫至明帝而本服絕故除遙等屬籍遙表曰竊聞聖人所以南面而聽天下其不可得變革者則親也尊也四世而總服窮五世而袒免六世而親屬絕矣去茲以往猶繫之以姓而弗別綴之以食而弗殊又律曰議親者非惟當世之屬親歷謂先帝之五世謹尋斯旨將以廣帝宗重

盤石先王所以變茲事條爲此別制者大和之季方有意於五屬經始之費慮深在初割滅之起暫出當時也且臨淮王提分屬籍之始高祖賜帛三千疋所以重分離樂良王長命亦賜縑二千疋所以存慈眷此皆先朝殷勤克念不得已而然者也古人有言百足之蟲至死不僵者以其輔已者眾臣誠不欲妄親太階苟求潤屋但傷太宗一分則天子屬籍不過千數人而已在漢親王之子不限多少皆列土而封謂之曰侯至於魏晉莫不廣胙河山稱之曰公者蓋惡其大宗之不固骨肉之恩疎矣臣去皇上雖是五世之遠於先帝便是天子之孫高祖所以國秩祿賦復給衣食后族惟給其賦不與衣食者欲以別內外限異同也今諸廟之感在心未忘行道之悲倏然已及其諸封者身亡之日三年服終然

後改奪今朝廷猶在過密之中便議此事實用未安詔付尙書博議以聞尙書令任城王澄尙書左僕射元暉奏同遙表靈太后不從

先是皇族有譴皆不持訊時有宗士元顯當犯罪宗正約以舊制尙書李平奏以帝宗磐石周布天下其屬籍疎遠廕官卑末無良犯憲理須根究請立限斷以爲定式詔曰雲漢縣遠蕃衍代滋植籍宗氏而爲不善者良亦多矣先朝旣無不訊之格而空相矯恃以長爲暴諸在議請之外者可悉依常法

齊置大宗正寺掌宗室屬籍統皇子王國長公主家唐太宗貞觀元年初上皇欲強宗室以鎮天下故皇再從三從弟及兄弟之子雖童孺皆爲王王者數十人上從容問羣臣徧封宗子於天下利乎封德彝對曰前世

惟皇子及兄弟乃為王自餘非有大功無為王者上皇
敦睦九族大封宗室自兩漢以來未有如今日之多者
爵命既崇多給力役恐非示天下以至公也上曰然朕
為天子所以養百姓也豈可勞百姓以養己之宗族乎
乃詔降宗室郡王皆為縣公惟有功者數人不降

蕙田案太宗此舉是也傳云親親之殺封爵
多則濫濫則淫淫則刑禍隨之豈保全宗族
之道乎

元宗先天之後皇子幼則居內東封後以年漸長成乃
於安國寺東附苑城同為大宅分院居之名為十王宅
令中官押之於夾城中起居每日家令進膳又引詞學
工書之人入教謂之侍讀十王謂慶忠棣鄂榮光儀穎
永濟蓋舉全數其後盛壽陳豐恒涼六王又就封入內

宅開元二十五年鄂光得罪忠王繼大統天寶中慶棣
又歿惟榮儀十四王居內而府幕列於外坊歲時通名
起居而已外諸孫長成又於十宅外置百孫院每歲幸
華清宮側亦有十王宅百孫院十王宮人每縣四百餘
人百孫院三四十人又於宮中置維城庫諸王月俸物
納之以給用諸孫納妃嫁女亦就十院中太子不居於
東宮但居於乘輿所幸之別院太子之子亦分院而居
婚嫁則同親王公主於崇仁里之禮院

唐宗正寺掌天子族親屬以別昭穆凡親有五等先定
於司封一曰皇帝周親皇后父母視三品二曰皇帝大
功親小功尊屬太皇太后皇太后皇后周親視四品三
曰皇帝小功親總麻尊屬太皇太后皇太后皇后大功
親視五品四曰皇帝總麻親祖免尊屬太皇太后皇太

后皇后小功親五日皇帝袒免親太皇太后小功卑屬
皇太后皇后總麻親視六品皇帝親之夫婦男女降本
親二等餘親降三等尊屬進一等降而過五等者不爲
親諸王大長公主長公主親本品嗣王郡王非三等親
者亦視五品選舉制凡館有二門下省有宏文館生三
十六人東宮有崇文館生二十人以皇總麻以上親皇
太后皇后大功以上親宰相貴官之子爲之
宋仁宗景祐中下詔度玉清昭應宮舊地建宮合宗室
十位聚居賜名曰瞻親院於祖宗後選一人爲宗正以
司訓導糾違失凡宗族之政令皆令掌之奏事毋得專
達先詳視可否以聞

初諸王邸散居京師過從有禁非朝謁從祠不得時
會見仁宗立瞻親院以壽春郡王允讓知大宗正事

總領輯睦甚有恩意務以身先之教養子孫崇尚藝
學不率則正其罪故更相責厲莫不勸服故事內朝
謁宗婦不預因曰託姻皇屬而不得一望禁闈非所
以顯榮之也奏通其籍又宗婦少喪夫雖無子不許
更嫁曰此非人情乃爲請使有歸

神宗熙甯二年中書樞密院言祖宗受命百年皇族日
以蕃衍而親疎之施未有等級甄序其材未能如古獻
議之臣謂宜有所釐正請參酌先王典制時事之宜條
具聞奏詔同議以聞臣等今謀定方今可行之制宣祖
太祖太宗之子皆擇其後一人爲宗世世封公補環衛
官以奉祭祀不以服屬盡故殺其恩禮祖宗袒免親親
將軍以下願出官者聽仍先經大宗正司陳請大宗正
擇本官尊長與大學教授使學才行堪任使者然後審

察以聞就武官者試讀律習書就文官者說試一中經
或論一首將軍換諸司副使太常丞正率換內殿崇班
太子中允並與州郡監當一次任滿與親民副率換西
頭供養官大理評事與監當一次任滿有州郡監司保
舉者與親民否則即依外官祖宗祖免親未賜名授官
者除右班殿直年十五與請給年二十許出官願換文
官者與試銜知縣並令監當考試及任滿有無保任如
前法出官日並特與友賜願鑲廳應舉者依外官其非
祖免親不賜名授官許應舉應進士者只試策論明經
者習一大經試大義及策初試不成文理者退黜餘令
覆試取合格者以五分爲限人數雖多不得過五十人
累經覆試不中年長者當特推恩量材錄用已出官者
給俸依在京分數許依審官三班銓法指擬注授不以

遠近爲限授文官者轉官者轉官與進士出身同鑲廳
應進士明經舉有出身人至員外郎與轉左曹宗室不
出官者祖宗元孫轉官至正任觀察使止祖免親至遙
郡刺史止祖宗祖免親見任官合奏薦子孫者許依外
官祖宗祖免親以下見有官不願出官父祖俱亡者許
在京居止隨處置產其出官者置田宅如外官法祖宗
祖免女嫁賜錢減半婿與三班奉職非祖免女量加給
賜更不與婿官有官者與免入遠許依審官三班流內
銓法指擬注授班行免指使其祖免親娶婦量加給賜
其非祖免親嫁娶依庶姓仍不得與非士族家爲婚姻
祖宗祖免親以外兩世貧無官者量賜田孤幼無依及
尤貧失所者不拘世數隨所在官司具名聞奏當職特
加存恤奏上詔曰自我祖宗敦敘邦族大則疏封於爵

士次則通籍於閣臺並留京師參奉朝請然而世緒寢遠皇枝益蕃屬有親疎則恩有隆殺才有賢否則祿有重輕今而一貫於周行是亦奚分於流別雖敦睦之道誠廣而德施之義未周故廷臣數言宰司繼請謂宜定正限以等夷朕惟親戚之間經史有訓漢唐之世故事具存或以九族辨尊卑或以五宗紀遠近或聽推恩而分子弟或許自試而効才能或宗子之賢得從科舉或諸王之女自主婚姻盡前世之所行顧當今之未備況我朝制作動法先王豈宗室等殺乃無定制因俾羣公之合議將立一代之通規載覽奏封具陳條目以謂祖宗昭穆是宜世世之封王公子孫抑有親親之教若乃服屬之既竭洎於才藝之並優在隨器以甄揚使當官而勉懋至於任子之令通婚之儀凡曰有司之常一用

外官之法僉言既允朕意何疑告於將來用頒明命宜依中書樞密院所奏施行

宗正寺言每歲寫仙源積慶圖宗藩慶緒錄送龍圖天章寶文閣今宗室非祖免親既不賜名授官一依外官之法請定所修圖冊詔下禮院詳定禮官言六世親屬既竭繫之以姓而弗別則禮有其義皇宗祖廟雖毀子孫皆於宗寺附籍則今有其文况朝廷釐改皇族授官之制而祖免外親統宗襲爵進預科選遷官給俸恩禮優異悉不與外官匹庶同法屬雖疎而恩數不絕若圖籍湮落則無審其所從證其宗正寺所修圖錄並請仍舊從之

元豐官制行詔大宗正司不隸六曹大宗正以宗室團練以上有德望者爲之次一人爲同知位高屬尊者爲

制掌糾合族屬而訓之以德行道藝受其詞訟而糾正其愆違有罪則先劾以聞法例不能決者同上殿取裁凡宗室服屬遠近之數及其賞罰規式皆總之屬有記室一人掌牋奏講書教授十有二人講授兼領小學之事渡江後頗用南班多不得其人無以表率更生刻削宗室皆患之

哲宗紹聖元年禮部言諸宗室係袒免以外兩世祖父俱亡而無官雖有官而未釐務貧不能給者委大宗正司及所在官司奏給錢米從之

徽宗崇甯元年詔曰神宗嘗詔宗室年長者推恩又嘗詔袒免外兩世貧無官者賜田又嘗詔外任者許居於兩京今宜遵先志宰臣蔡京等言宗室舊來在宮有出入之限有不許外交之禁宮門有幾察之令今疎屬外

屬僅遍都下積日滋久殆不能容若不居之兩京散之近郡立關幾察之令或一有非意犯法則勢有不可已者今請非袒免親以下兩世除北京外欲分於西京南京近輔或沿流便郡居止各隨州郡大小創置居宇仍先自兩京爲始每處置敦宗院命文武官各一員管幹參酌在京宮院法禁不可行者頒下從之

大觀二年正月詔自我英宗起於濮邸入繼大統濮王之後於屬雖親於服已遠如不字之子論正服則猶是總麻視正統則已非袒免無賜名授官之制無祿廩賜予之法比聞貧乏匱困或不能自存朕富有天下而五服內親僅同民庶非強本之道欲盡親親之禮而承統之重義所不敢夙夜以思當使恩義兩得然後爲稱應濮王孫士字可依仲字不字及不字之子並依士字恩

數條例宗女隨其字行等第施行庶不失承統之義而曲盡人倫之親

八月詔保州皇族子孫於屬雖遠然未有仁而遺其親者比聞皇族之孫未官者餘三十人或貧乏不能自存已令置敦宗院其六房內各擇最長年二十已上者與三班奉職二人一房及六人已上加一人並與添差監

當

宣和五年詔今後內外宗室並不稱姓七年後詔依熙甯法並著姓

建炎末上以天屬避地者少詔南班宗婦無子孫食祿者廩給有差凡祖宗總麻親歲給錢九十六千米三十六斛帛二十八疋祖免親錢米減三之二綿帛並減半四年六月己卯故事宗室近臣吉凶皆有賜予紹興初以軍興財

匱罷之六年正月己巳十一年秋皇叔祖右監門衛大將軍仲岳

卒於臨安至無以斂判大宗正事齊安郡王士儂言於

朝詔總麻親任環列以上亡者賜錢三百千祖免減三

之一九月甲辰今以為例焉本朝宗室皆聚於京師熙甯間始

許居於外蔡京為政即河南應天置西南二敦宗院設

宗官主之靖康之禍在京宗室無得免者而睢雍二都

得全建炎初上將南幸先徙諸宗室於江淮於是大宗

正司移江甯南外移鎮江西外移揚州元年八月戊午明年春又

移西外於秦州及高郵軍甲子三年冬又移於福州而南

外移泉州以避狄甲子紹興元年秋嗣濮王仲湜請合

西南外宗正為一司以省財用有司以泉州乏財不許

是時兩外宗子女婦合五百餘人歲費緡錢九萬紹

興府宗正司者紹興三年以行在未有居第權分宗子

居之三十年春恩平郡王出居會稽遂以爲判大宗正
事事乾道七年虞丞相秉政言蜀中闕大宗正司上欲
移紹興府宗正司於成都五月既而不行但省會稽一司
而已今蜀中宗子甚眾既無親賢領之但每州以行尊
者一員檢察錢米請受由是往往蹈於非彝而不可訓
焉

東都故事宗子皆築大舍聚居之太祖太宗九王後曰
睦親秦王後曰廣親英宗二王曰親賢神宗五王曰棣
華徽宗諸王曰蕃衍渡江後宗子始散居郡邑惟親賢
子孫爲近屬則聚居之孝宗子四人邵悼肅王無後莊
文太子魏惠憲王早薨莊文之妃惠憲之夫人皆別居
賜第初莊文既大祥議者欲皇孫出居於外或以爲不
可又踰年竟以知樞密院府爲外第焉紹熙初甯宗封

嘉王將以所籍富民裴氏之居爲府第而議者以爲非
宜乃改築蓋自紹興以來天屬鮮少故不復賜宅名云
續文獻通考遼皇族有五院六院橫帳之分五院有夷
離堇房六院有郎君房夷離堇房部舍利房橫帳有孟
父房仲父房季父房統謂之三父房自德祖族屬號三
父房始稱橫帳乃宗室之尤貴者蓋分益親則名益貴
也

約登
史文

遼史百官志肅祖長子洽脊之族在五院司仲子葛刺
季子洽禮及懿祖仲子帖刺季子裏古直之族皆在六
院司此五房者謂之二院皇族元祖伯子麻魯無後次
子巖朮之後曰孟父房叔子釋魯之後曰仲父房季子
爲德祖德祖之元子爲太祖謂之橫帳次日刺葛日迭
刺日寅底石日安端日蘇皆曰季父房此一帳三房謂

之四帳皇族二院治之以北南二王四帳治之以大內
惕隱皆統於大惕隱司遼俗東嚮而尙左御帳東嚮遙
輦九族南嚮皇族三父帳北嚮故謂御營為橫帳

國語解國族皆姓耶律有謂始興之地曰世里譯者以
世里為耶律契丹國志曰世里上京東二百里之地名也以所居之地為姓譯之則曰耶律又有言以漢字

書曰耶律以契丹字書曰移刺

太祖本紀元年詔皇族承遙輦氏九帳為第十帳二年

正月始置惕隱典族屬以皇弟撒刺為之即宗正職也

續文獻通考大內惕隱司掌皇族四帳之政教大橫帳

常袞司掌太祖皇帝後九帳皇族之事常袞亦曰啟隱又有孟父

族帳常袞司季父族帳常袞司皆各掌其房族之事又

有四帳都詳穩司掌四帳軍馬之事舍利司掌皇族之

軍政

遼史太祖本紀六年以皇弟蘇為南府宰相南府宰相

自諸弟構亂府之名族多罹其禍故其位久虛至是告

於宗廟而後授之宗室為南府宰相自此始自後皇族

四帳世預其選

太宗本紀天顯五年三月皇弟李胡請赦宗室舍利郎

君以罪繫獄者詔從之

興宗本紀重熙十一年賑恤三父族之貧者

金史宗室表金人初起完顏十二部其後皆以部為氏

史臣記錄有稱宗室者有稱完顏者完顏亦有二有同

姓完顏蓋疎族若石土門迪古乃是也有異姓完顏蓋

部人若歡都是也大定以前稱宗室明昌以後避睿宗

諱稱內族其實一而已宣宗詔宗室皆稱完顏不復識

別焉大定泰和之閒袒免以上親皆有屬籍以敘授官

飲食禮

左

大功以上薨卒輟朝親親之道行焉貞祐以後譜牒散失矣

穆宗子最傳皇兄弟皇子為親王給二品俸宗室封一字王者給三品俸

百官志太宗正府掌敦睦糾率宗屬以皇族中屬親者充泰和中避睿宗諱改為大睦親府

熙宗本紀皇統四年詔以去年宋幣賜始祖以下宗室海陵本紀正隆二年改定親王以下封爵等第命置局

追取存亡詰身存者二品以上死者一品參酌削降公私文書但有王爵字者立限毀抹雖墳墓碑誌並發而毀之

世宗本紀大定十二年十一月帝謂宰臣曰宗室中不任官事者若不加恩澤於親親之道有所未宏朕欲

授以散官量與廩祿未知前代何如左丞石琚曰陶唐之親九族周家之睦九族見於詩書皆帝王美事也

十六年正月詔宗室未附玉牒者並與編次四月詔定宗室子程試等第

十七年正月帝謂宰臣曰宗室中年高者往往未有官稱其先皆有功於國朕欲稍加以官使有名位可稱如

何對曰親親報功先王之令則五月尚書省奏定皇家袒免以上親燕饗班次並從唐制

二十二年十月徙河間宗室於平州

二十五年四月以會甯府京地官一人兼大宗正丞以治宗室之政

章宗本紀明昌元年六月定親王家人有犯其長史府

搽失察故縱罪八月刺麻吉以皇家袒免之親特收充
尚書省祇候郎君仍為永制

三年遣諭諸王府傅尉曰朕分命諸王出鎮蓋欲政事
之暇有以自適耳然慮其舉措或違於理所以分置傅
尉使勸導彌縫不入於過失若公餘遊宴不至過度亦
復何害今聞爾等用意太過凡王門細碎之事無妨公
道者一一干與贊助之道豈當如是宜各思職分事舉
其中無失禮體仍就諭諸王使知朕意

四年諸王府增置司馬一人

承安五年三月大睦親府進重修玉牒九月修玉牒成
定皇族收養異姓男為子者徒三年姓同者減二等立
嫡違法者徒一年

元史世祖本紀中統元年賜親王銀文綺金素綿絹白

是歲以為常

明史諸王列傳明制皇子封親王授金冊金寶歲祿萬
石府置官屬護衛甲士少者三千人多者至萬九千人
親王嫡長子年及十歲則授金冊金寶立為王世子長
孫立為世孫諸子年十歲則授塗金銀冊銀寶封為郡
王嫡長子為郡王世子嫡長孫則授長孫諸子受鎮國
將軍孫輔國將軍曾孫奉國將軍四世孫鎮國中尉五
世孫輔國中尉六世以下皆奉國中尉其生也請名其
長也請婚祿之終身喪葬子費

王圻續通考鎮國將軍

初定為三品承樂時改一品

輔國將軍

初四品改從二品

奉國將軍

初五品改從三品

鎮國中尉

初六品改從四品

輔國中尉

初七品改從五

品奉國中尉

初八品改從六品

諸王世表洪武中以子孫蕃眾命名慮有重複乃於東

宮親王世系各擬二十字字為一世子孫初生宗人府
依世次立雙名以上一字為據其下一字則取五行偏
旁者以火土金水木為序惟靖江王不拘東宮擬名曰
允文遵祖訓欽武大君勝順道宜逢吉師良善用晟秦
府曰尚志公誠秉惟懷敬誼存輔嗣資廉直匡時永信
敦晉府曰濟美鍾奇表知新慎敏求審心咸景慕述學
繼前修燕府後為帝系曰高瞻祈見祐厚載翊常由慈
和怡伯仲簡靖迪先猷周府曰有子同安睦勤朝在肅
恭紹倫敷惠潤昭格廣登庸楚府曰孟季均榮顯英華
蘊盛容宏才升博衍茂士立全功齊府曰賢能長可慶
睿智實堪宗養性期淵雅寅思復會通魯府曰肇泰陽
當健觀頤壽以宏振舉希兼達康莊遇本甯蜀府曰悅
友申賓讓承宣奉至平懋進深滋益端居務穆清湘府

曰久鎮開方岳揚威謹禮儀剛毅循超卓權衡素自持
代府曰遜仕成聰俊充庭鼎彝傳貽連秀郁炳耀壯
洪基肅府曰瞻祿貢真弼縉紳識烈忠曦暉躋富運凱
諫處恆隆遼府曰貴豪恩寵致憲術儼尊儒雲仍祺保
合操翰麗龍輿慶府曰秩遂寘台肅倪仲師倬奇适完
因巨衍騰眷發需昆甯府曰馨奠覲宸拱多謀統議中
總添支庶濶作哲向親衷岷府曰徽音膺彥譽定幹企
禮雍崇理原諮訪寬鎔喜賁從谷府曰賦質僖雄啟叢
興闡福昌篤諧恂懌豫擴壽昱禎祥韓府曰冲範徵偕
旭融謨朗璟遠亶韶愉灑慥令緒价藩維藩府曰佶幼
詮勛允恬瑄效迴瑄湜源諠晬圭璧澈澄昂安府曰
斐序斌廷賞凝覃濟祉襄恢嚴頤輯矩縝密廓程綱唐
府曰瓊芝彌宇宙碩器聿琳琚啟齡蒙頌體嘉歷協銘

圖郢府曰偉聞參望爽箴誨泊皋夔麒麟餘積兆奎穎
粵塔幾伊府曰顯勉諱訂典褒珂采鳳琛應疇頌宵選
昆玉冠泉金靖江王曰贊佐相規約經邦任履亨若依
純一行遠得襲芳名考明代帝系熹宗莊烈二帝名始
及由字其他王府亦多不出十字

食貨志太祖洪武九年定諸王公主歲供之數親王米
五萬石鈔二萬五千貫錦四十疋紵絲三百疋紗羅各
百疋絹五百疋冬夏布各千疋綿二千兩鹽二百引茶
千斤皆歲支馬料草月支五十匹其緞疋歲給匠料付
王府自造靖江王米萬石鈔萬貫餘物半親王馬料草
二十四公主未受封者紵絲紗羅各十疋絹冬夏布各
三十疋綿二百兩已受封賜莊田一所歲收糧千五百
石鈔二千貫親王子未受封視公主女未受封者半之

子已受封郡王米六千石鈔二千八百貫錦十疋紵絲
五十疋紗羅減紵絲之半絹冬夏布各百疋綿五百兩
鹽五十引茶三百斤馬料草十匹女已受封及已嫁者
米千石鈔千四百貫其緞疋於所在親王國造給皇太
子之次嫡子并庶子既封郡王必俟出閣然後歲賜與
親王子已封郡王者同女俟出嫁與親王女已嫁者同
凡親王世子與已封郡王同郡王嫡長子襲封郡王者
半始封郡王女已封縣主及已嫁者米五百石鈔五百
貫餘物半親王女已受封者郡王諸子年十五各賜田
六十頃除租稅為永業其所生子世守之後乃令止給
祿米

二十八年詔更定諸王歲給時以官吏軍士俸給彌廣
量減諸王歲給以資軍國之用乃更定親王萬石郡王

二千石鎮國將軍千石輔國將軍奉國將軍鎮國將軍
中尉以二百石遞減輔國中尉奉國中尉以百石遞減
公主及駙馬二千石郡主及儀賓八百石縣主郡君及
儀賓以二百石遞減縣君鄉君及儀賓以百石遞減自
後為永制

太祖本紀二十二年正月改大宗正院為宗人府
職官志宗人府掌皇九族之屬籍書宗室子女適庶名
封嗣襲生卒婚嫁諡葬之事凡宗室陳請為聞於帝達
材能錄罪過洪武三年置大宗正院至是改為宗人府
竝以親王領之其後以勳戚大臣攝府事不備官而所
領盡移之禮部

王圻續通考太祖時定宗室傳世爵級凡將軍中尉以
下其有文武才能堪任用者宗人府具以名聞考驗陞

轉如常選法如有犯宗人府取聞明白奏聞輕則量
罪降等重則黜為庶人但明賞罰不加刑責著為令

明史仁宗本紀永樂二十二年九月時仁宗已即位增諸王歲祿

食貨志仁宗增減諸王歲祿非常典也時鄭越襄荆淮
滕梁七王未之國令暫給米歲三千石遂為例

史料前集洪熙元年周府加米五千石通前二萬石
悉支本色慶府原祿一萬石悉支本色甯府加米九
千石通前一萬石悉支本色代府加米千五百石通
前二千石悉支本色藩府加米七千石通前萬石內
本色六千石餘折鈔唐府加米七百石通前二千石
悉支本色魯府加米二千石通前五千石悉支本色
遼府加米一千石通前二千石悉支本色肅府加米
五百石通前一千石悉支本色秦府原祿一萬石內

加米四千五百石通前五千石支本色餘五千石折鈔伊府加米一千七百石通前二千石悉支本色靖江王加米七百石通前一千石悉支本色趙漢二府各加米二萬石通前三萬石仍歲加鈔十萬貫晉府給米三千石明年又給韓王歲祿三千石內一千五百石本色餘折鈔襄陵王樂平王各歲祿千石內五百石本色餘折鈔漢庶人以宣德元年反削國而趙王亦辭所加之祿矣

英宗正統十二年定王府祿米撥給之制將軍自賜名受封日為始縣主儀賓自出閣成婚日為始於附近州縣秋糧內撥給至景帝景泰七年定郡王將軍以下祿米出閣在前受封在後以受封日為始受封在前出閣在後以出閣日為始

孝宗本紀宏治三年禁宗室奏請田土及受人投獻魯王傳世宗嘉靖三年定宗室毋得以媵子為嫡之例世宗本紀嘉靖四十年頒宗藩條例續文獻通考初太祖大封宗藩令世世食祿而不任事親親之誼甚厚然天潢日繁民賦有限其始祿米盡支本色既而本鈔兼支有中半者有本多於折者厥後勢不能給而冒濫益多奸弊百出自宏治開禮部尚書倪岳即請節減以寬民力嘉靖九年禮部覆豐林王議處宗室疏帝意欲封帝之皇子為郡王親王次子為鎮國將軍以張璠言宜量減祿而不降封乃止四十一年御史林潤言天下財賦供京師米四百萬石而各藩祿歲至八百五十三萬石即無災傷蠲免歲輸亦不足供祿米之半將軍以下飢寒困辱聚訟有司守土之臣每懼

生變夫賦不可增而宗室日繁將何以支事下諸王議至是乃定條例郡王將軍七分折鈔中尉六分折鈔郡縣主郡縣鄉君及儀賓八分折鈔他冒濫者多所裁減於是秦晉周楚蜀趙慶襄淮德崇歲祿萬石辭一千石魯益衡歲祿萬石辭二千石崇王萬三百石與唐王六千五百石俱辭五百石歲出為少紓而將軍以下益不能自存矣

嘉靖四十一年下諸王議時其明年南陵王睦榘條上七議請立宗學以崇德教設科選以勵人材嚴保勘以杜冒濫革冗職以除素餐戒奔競以息貪饕制拜掃以廣孝思立憂制以省祿費詔下廷臣參酌之其後諸藩遂稍稍陳利弊禮部尚書李春芳集而上之諸吉凶大禮及歲時給賜皆嚴為之制而武岡王顯槐復上書條

藩政請設宗學擇立宗正宗表督課親郡王以下子弟十歲人學月米一石三載督學使者考績其中程式者全錄之五試不中科則黜之給以本祿三之一其庶人暨妻女月餼六石案食貨志宗室有罪革爵者曰庶人英宗初頗給以糧時減至二石或一石庶女勿加恩其頒宗藩條例時多採睦榘顯槐二王議云

王世貞處宗室策國家待宗室自親王至中尉凡八等其支子歷八世至於庶人而祿始絕王國所屬長史衛校百千人而止耳不得臣他吏民干有司事親王常祿萬石郡王二千石鎮國將軍千石以至於庶人亦百石而他婚嫁居第資送導從之費不與焉親米石軍核官僚居第婚喪之費又不下數萬下至於庶人而人各歲百石居第二百金婚娶百金此不可已也嘗觀嘉靖二十八年宗正籍見存者已萬餘人今又十餘年矣人益

其半而合之當爲二萬人又十餘年而人益其半而合之當爲四萬五千人酌祿之中人各得五百石益萬人是益萬五百石粟也大司農何以應之官又爲厲禁俾不得從農商之業其賢者又不得借寒士從有司之薦非所以明親親用賢之道也今請自將軍以上少裁其祿數而務實其惠中尉以下毋賜爵祿而寬其禁使其賢者得與寒士角才而授任不肖者從事於南畝以其力周其身而官弗與焉庶乎其猶可支也

明史諸王世表神宗萬曆七年更定親王承襲之例親王之子例封郡王若以支屬嗣者自後長子襲封親王外餘子仍照原封世次授以本等爵級不得冒濫郡爵郡王無子兄弟及兄弟之子不得請襲違者爲冒封

王圻續通考萬曆十年定各王府玉牒每年八月投禮部宗人府收貯或有嫡庶混淆名位舛錯那移封期增減歲月者駁回重繕

宗室之子年十歲以上俱入宗學於宗室中推舉一人爲宗正領其事年十五乃請封給祿米三分之一仍留學五年驗有進益方出學始給全祿

天順八年定各王府所生子女年至十五方許請封嘉靖四十年定各王府所生子五歲卽請名萬曆時定各府所生子五歲請名十歲請封十五歲選婚所生女十五歲請封卽與選婚若因事就延未能如期奏請者聽若所生子請名請封過期者五年查題十年行勘十五年勘明另題止給名糧五十石本折分支十五年以上立案如係聽繼王爵人數過期年久另題立案者臨期

請旨御定男選婚女請封過期至十五年以上者立案其庶人請給名糧亦以十歲爲斷過期如選婚例宗人有罪者錮高牆高牆在中都今鳳陽凡先後入高牆者男女且千人嘉靖四年至十八年共釋三百八十六人還原邸給薪米自便其婚嫁之資一槩免給萬曆時令查先年罪案極重者子孫止從寬釋不得濫請名糧稍輕者許現在子孫請名歲給米十二石身終卽止輕者其日後子孫亦得請給如止遺母妻而無子孫可倚者歲給米六石終其身妾媵不給凡庶人皆不得更乞冠帶

明史神宗本紀十八年更定宗藩事例始聽無爵者得自便

三十三年開宗室科舉入仕例

續文獻通考鄭世子載堦於二十二年正月上疏請宗室皆得儒服就試毋論中外職中式者視才品器使詔允行奉國中尉以下入試輔國中尉以上爵尊不得與其後禮臣李廷機言封爵科目原自兩途彼旣願得科目入仕應照士子出身資格銓除何拘原爵亦從之惟不得除京朝官

明史熹宗本紀天啟五年五月行宗室限祿法

熹宗實錄時禮部尙書薛三省奏定宗藩限祿之法以天啟四年以前之祿數爲天啟五年以後之祿額就各府見錄多寡自爲通融令各省撫按酌爲歲額又奏言祖制宗室郡王止四妾將軍以下遞減一人蓋亦限子之微意今請郡王以五子爲率一子襲封餘四子各得應得封祿此外多一子則合四子之祿爲五分以均給

之子遞增則諸子之祿遞減侯諸子之祿僅與名祿庶人等然後官為增祿一人將軍中尉之子亦然乞以此著為令報可

右漢至明惇敘宗室

五禮通考卷第一百四十四

五禮通考卷第一百四十五

內廷供奉禮部右侍郎金廣秦蕙田編輯

兩淮都轉鹽運使德水盧見曾

李太僕總督蘇若鄰史桐城方觀承同訂

直隸按察司副使元和宋宗元

參校

嘉禮十八

飲食禮

周禮天官天宰之職以九兩繫邦國之民五曰宗以族

得民

注繼別為大宗收族者疏大宗子與族食族燕序以昭穆所以收族民即族人也

張子曰管攝天下人心收宗族厚風俗使人不忘本須是明譜繫世族與立宗子法古人鮮有不知來處者宗子法廢後世尚譜牒譜牒又廢人家不知來處無百年之家骨肉無統雖至親恩亦薄宗子之法不立則朝廷無世臣且如公卿一日崛起於貧賤之中以至公相宗法不立既死遂族散其家不傳宗法

若立則人人各知來處朝廷大有所益或問朝廷何所益曰公卿各保其家忠義豈有不立忠義既立朝廷之本豈有不固今黷得富貴者止能為三四十年的計造宅一區乃其所有既死則眾人分裂未幾蕩盡則家遂不存如此則家且不能保又安能保國家李氏觀曰大宗者其先祖之負荷族人之綱紀乎夫五服者人道之大治也然而上盡於高祖則遠者忘之矣旁盡於三從則疏者忘之矣故立大宗以承其祖族人五世外皆合之宗子之家序以昭穆則是世祖常祀而同姓常親也

薛氏季宣曰百夫無長不散則亂一族無宗不離則疏先王因族以立宗敬宗以尊祖故吉凶有以相及有無有以相通尊卑有分而不亂親疏有別而不二

貴賤有繁而不閒然後一宗如出一族一族如出一家一家如出一人此所以得民也

鄭氏鏐曰大宗則收族雖無服之親亦係屬而不散故族可以得民

呂氏大臨曰古之典禮者皆以宗名之故伯夷作秩宗周官有宗伯下及乎都家皆有宗人宗者廟也禮始於親親親親之法非廟不統所以別姓收族無一不出於祖廟不主乎祖宗故天子之元子為天子之大宗以繼其太祖而別子為諸侯諸侯不敢祖天子而自為一國之太祖故諸侯之元子亦為諸侯之大宗以繼其太祖而別子為大夫大夫亦不敢祖諸侯而自立家為別子之祖繼別者為宗亦謂之大宗所以別小宗而百世不遷者也小宗有四五世則遷者

也故繼高祖之宗得祀高祖凡族兄弟皆宗之族兄弟同出於高祖故高祖與族兄弟之服皆三月至於繼祖繼曾祖繼禰所祀所宗莫不做此故其所祀者皆謂之宗子以主家政而宗之者皆聽命焉

蕙田案或謂惟大夫士有宗法天子諸侯不為宗非也書稱高宗中宗詩曰宗子維城又曰大宗惟藩滕文公曰吾宗國魯先君則天子諸侯亦稱宗明矣蓋自為天地宗廟社稷之宗而非五宗之所得擬也

詩大雅篤公劉君之宗之

宋子集傳宗尊也主也嫡子孫主祭祀而族人尊之以為主也

李氏傳曰周禮宗子有五大宗子一小宗子四別子為祖繼別為宗百世不遷者大宗也繼禰之宗繼祖之宗繼曾祖之宗繼高祖之宗五世則遷者小宗也

皆所以主祭祀而統族人

如有國有家之重者也

呂氏祖謙曰古者建國立宗其事相須詩君之宗之言公劉整率其民上則皆屬於君下則各統於宗其相維如此

欽定義疏繼別之宗謂公子及異姓起家為大夫者周禮曰以族得民詩曰君之宗之則庶民之家亦有宗矣意一姓聚居者雖無仕宦朝廷皆為立宗以統攝之

禮記大傳別子為祖繼別為宗繼禰者為小宗別子謂

來在此國者後世以為祖也繼別謂別子之世適也族人尊之謂之大宗是宗子也繼禰者父之適也兄弟尊之謂之小宗疏此下廣陳五宗義也別子謂諸侯之庶子也諸侯之適子適孫繼世為君而第二子以下悉不得禰先君故云別子也為其後世之始祖故云為祖也鄭註若始來在此國謂非君之親或是異姓始來亦謂之別子以其別於在本國不來者繼別謂別子之適子世繼別子為大宗也族人與之為絕族者五世外皆為之齊衰三月母妻亦然繼禰謂父之適子上繼於禰諸兄弟宗之謂之小宗以本親之服服之

陳氏祥道曰人生而莫不有孝弟之心親睦之道先王因其有是道而為之節文故立為五宗以糾序族人而使之親疏有以相附赴告有以相通然後恩義不失而人倫歸厚此周官所謂宗以族得民也蓋諸侯之適子孫則繼世為君而支子之為卿大夫者謂之別子有自他國而來於此者亦謂之別子有起自

民庶而致位卿大夫者亦從別子之義此三者各立宗而為大宗所謂繼別者也若魯之仲孫叔孫季孫之類是也其適子弟之長子則謂小宗所謂繼禰者也

陳氏澠曰別子有二一是諸侯適子之弟別於正適二是異姓公子來自他國別於本國不來者三是庶姓之起於是邦為卿大夫而別於不仕者皆稱別子也為祖者別與後世為始祖也繼別為宗者別子之後世世以適長子繼別子與族人為百世不遷之大宗也

蕙田案別子有三公子之外其自他國而來及崛起為卿大夫者皆指命氏賜族者言之

通典薛綜述鄭氏禮五宗圖天子之子稱王子王子封諸侯若魯衛是也諸侯之子稱公子公子還自仕食采於其國為卿大夫若魯公子季友者是也則子孫自立此公子之廟謂之別子為祖則嫡嫡相承作大宗百代不絕

呂氏祖謙曰別子為祖如魯桓公生四子莊公既立為君則慶父叔牙季友為別子繼別為宗如公孫敖

繼慶父是為大宗繼禰者為小宗如季武子立悼子悼子之兄曰公彌悼子既為大宗則繼公彌者為小宗所以謂之繼禰者蓋自繼其父為小宗不繼祖故也

晉杜預宗譜別子者君之嫡妻之子長子之母弟也君命為祖其子則為大宗常有一主審昭穆之序辨親疏之別是故百代不遷若無子則支子為後雖七十無無主婦若殤則緘經加一等以兄弟之列代之殤無為父道兄弟昭穆同故也死皆為之齊緘其月數各隨親疏為限雖尊雖出嫁猶不敢降也屬絕則為之齊緘三月若始封君相傳則自祖始封君其支子孫皆宗大宗然則繼體君為宗中之尊支庶莫敢宗之是以命別子為宗主一宗奉之故曰祖者高祖

也言屬逮於君則就君屬絕於君則適宗子家也而說者或云君代代得立大宗或云別子之母弟亦得為祖或云命妾子為別子其嫡妻子則遷宗於君皆非也別子之弟子孫無貴賤皆宜宗別子之子孫小宗一家之長也同族則宗之其服隨親疏為比姊妹出嫁不敢降之五屬斷服則不宗之矣

朱子曰君嫡長為世子繼先君為正統自母弟以下皆不得為宗其次適為別子不得禰其父又不可宗嗣君又不可無統屬故死後立為大宗之祖所謂別子為祖也其適子繼之則為大宗直下相傳百世不遷

別子者為諸侯之弟別於正適故稱別子也為祖者自與後世為世祖謂此別子子孫為卿大夫立此別子為始祖也繼別為宗謂別子之世世長子當繼別子與族人為不遷之宗也

方氏慤曰諸侯之適子繼世而為君非別弟之所敢宗諸侯之於庶子不為之服而子亦不敢私相服故君命長弟以統之使夫不敢宗君者有所宗不敢相服者有以相服此宗道所以立也別子為祖者適子既為諸侯則別子乃大夫曰大夫不敢祖諸侯故自別為祖焉別子即庶子也然庶子有二例別而言之妻之子無長幼皆為適子妾之子無長幼皆為庶子合而言之自繼世之子為適子其餘離妻之子亦庶子而已

蕙田案疏云諸侯第二子以下悉不得禰先君故云別子並為其後世之世祖杜氏宗譜別子君之嫡妻之子長子之母弟君命為祖其子為大宗別子之弟子孫皆宜宗別子之子孫二說不同據經文下云有大宗而無小宗有小宗而無大宗又云公子之公為其士大夫之庶者宗其士大夫之適者則杜氏之說較為明確蓋別子乃由君命為之置後故

為先君大宗之祖羣公子皆宗之世世為大宗與凡公子之為祖者有閒也詳見公子有宗道條下

有百世不遷之宗有五世則遷之宗百世不遷者別子之後也宗其繼別子之所自出者百世不遷者也宗其繼高祖者五世則遷者也尊祖故敬宗敬宗尊祖之義

也 注遷猶變易也小宗四與大宗凡五 疏此覆說大宗小宗之義百世不遷謂大宗也五世則遷謂小宗也宗其繼別子之所自出者自由也別子或由此君而出或由他國而來適子適孫世世繼別子故鄭註云世適也五宗者一是繼繼與親兄弟為宗二是繼祖與同堂兄弟為宗三是繼曾祖與再從兄弟為宗四是繼高祖與三從兄弟為宗是小宗四并繼別子之大宗凡五宗也

陳氏禮書公子不禰先君故為別子而繼別者族人宗之為大宗庶子不得祭祖故諸兄弟宗之為小宗以其服服之大宗遠祖之正體則一而已小宗高祖之正體其別有四四世則親盡屬絕而不為宗矣然

言繼別為宗又言繼別子之所自出者言繼禰為小宗又言宗其繼高祖者則繼別者別子之子也繼別子之所自出者即別子也繼禰者庶子之子也繼高祖者五世之孫也繼禰言其始繼高祖言其終繼別言其宗繼別子之所自出言其祖經言繼別子之所自出而孔穎達言別子之所由出然則別子所由出即國君也其可宗乎穀梁曰燕周之分子也分子即別子也

陳氏埴曰宗法源頭有大宗以統之則人同知尊祖分派處有小宗以統之則人各知敬禰且始封之君其適子襲封則庶子為大夫大夫不得以禰諸侯故自別為大夫之祖是謂別子為祖也別子之適子則為大宗使繼其祖之所自出從此直下適子世為大

宗合族同宗之是謂繼別爲宗也別子之庶子又不
得以禰別子卻待其子繼之而自別爲禰繼禰遂爲
小宗凡小宗之適子服屬未盡常爲小宗凡小宗之
庶子又別爲禰而其適子又各爲小宗兄弟同宗之
謂繼禰爲小宗是也大宗是世祖正派下雖其後支
分派別皆同宗此祖則合族皆服齊衰三月初不以
親屬近遠論是爲百世不遷之宗小宗是禰正派下
親盡則絕如繼禰者親兄弟宗之爲之服期繼祖者
則從兄弟宗之爲之服大功繼曾祖者再從兄弟宗
之爲之服小功繼高祖者三從兄弟宗之爲之服總
自此以後代常趨一代是爲五世則遷之宗宗法之
立嫡長之尊有君道焉大宗所以統其宗族小宗所
以統其兄弟大宗止是一人小宗儘多故一人之身

從下數至始祖大宗惟一數至高祖小宗則四
朱子文集百世不遷者以其統先君之子孫而非統
別之子孫也別子之庶長義不禰別子而自爲五世
小宗之祖其適子繼之則爲小宗小宗者繼別子庶
子之所自出也故惟及五世五世之外則無服蓋以
其統別之子孫而非統先君之子孫也不知是否伏
乞垂誨曰宗子有公子之宗有大宗有小宗國家之
眾子不繼世者若其閒有適子則眾兄弟宗之爲大
宗若皆庶子則兄弟宗其長者爲小宗此所謂公子
之宗者也別子卽是此宗子既沒之後其適長者各
自繼此別子卽是大宗直下相傳百世不遷別子之
眾子既沒之後其適長子又宗之卽爲繼禰之小宗
每一易世高祖廟毀則同此廟者是爲袒免之親不

復相宗矣所謂五世而遷也

答董叔重

有小宗而無大宗者有大宗而無小宗者有無宗亦莫

之宗者公子是也

注公子有此三事也公子謂先君之子今君昆弟

宗不可無人主領之義君無適昆弟適庶兄弟一人為宗領公子禮如小宗是有

小宗而無大宗也君有適昆弟使之為宗以領公子更不得立庶昆弟為宗是有

大宗而無小宗也公子唯一無他子可為宗是無宗亦無他公子

來宗已是亦莫之宗也公子是也言此三事他人無唯公子有也

朱子曰有有大宗而無小宗者有適則不立小宗也

有有小宗而無大宗者無適則不立大宗也謂如人

君有三子一嫡而二庶則庶宗其嫡是謂有大宗而

無小宗皆庶則宗其庶長是謂有小宗而無大宗止

有一人則無人宗之已亦無人宗焉是謂無宗亦莫

之宗也下云公子之公為其士大夫之庶者宗其士

大夫之嫡者此正解有大宗而無小宗一句之公之

公猶君也

公子有宗道公子之公為其士大夫之庶者宗其士大

夫之適者公子之宗道也

注公子不得宗君君命適昆弟為之宗使

大宗死為之齊衰九月其母則小君也為其妻齊衰三月無適而宗庶則如

小宗死為之大功九月其母妻無服公子惟已而已則無所宗亦莫之宗

陳氏曰此又申言公子之宗道公子之公謂公子之適兄弟為君者為其庶

兄弟之為士為大夫者立適公子之為士大夫者為宗使此庶者宗之故云宗

其士大夫之適者此適是君之

同母弟適夫人所生之子也

晉曹述初曰禮諸侯不服庶子先君之所不服子亦

不敢私相服也夫兄弟之恩既不可以無報親戚羣

居又不可以無主故君必命長弟以為之宗宗立而

相服相服之義由於其宗故曰公子有宗道也公子

之公為其士大夫之庶宗者公子之公謂君之庶弟

受命為宗者也其有功德王復命為諸侯尊羣庶所

不敢宗故此君復命其次庶弟代已為宗主士大夫

羣庶之在位者也

三禮卷之五
蕙田案公子有宗道公子之公當以曹氏解
為的

呂氏祖謙曰假如國君有兄弟四人庶而一嫡嫡者君之同母弟公子既不敢宗君則命同母弟為之宗使庶兄弟宗焉若皆庶而無適則須令庶長權攝祭事傳至于則自宗矣

蕙田案東萊之說是也亦可見國君之子不得皆為別子矣華霞峯云士大夫之庶者宗其士大夫之嫡者如滕謂魯為宗國也

呂氏大臨宗子議國君之嫡長為世子繼先君之正統自母弟而下皆不得宗次嫡為別子別子既不得禰先君則不可宗嗣君又不可無所統屬故為先君一族大宗之祖其生也適庶兄弟皆宗之別子之母

弟雖適子與羣公子同不得謂之別子其死也子孫世世繼之為先君一族之大宗凡先君所出之子孫皆宗之雖百世不遷無後則族人以支子繼之此謂別子為祖繼別為宗羣公子雖宗別子而自為五世小宗之祖死則其子其孫為繼禰繼祖之小宗至五世以上則上遷其祖下易其宗無子孫則絕此謂繼禰者為小宗每一君有一大宗世世統其君之子孫故曰宗其繼別子之所自出者百世不遷者也別子所自出謂別子所出之先君如魯季友乃桓公之別子所自出即桓公大宗者乃桓公一族之大宗公子之公為其士大夫之庶者宗其士大夫之適者則別子為先君大宗之祖羣公子皆宗之是謂有大宗而無小宗若君無次適可立為別子止有庶公子數人

則不可無宗以統當立庶長一人為小宗使諸弟皆宗之是謂有小宗而無大宗若庶長死國君復追立庶長為別子以為先君一族大宗之祖而以其子繼之此雖不經見然以義求之則一君之大宗不可以絕後也若君之正嫡外止有一公子既不可宗君又無昆弟宗己是謂無宗亦莫之宗然此公子亦為其先君一族大宗之祖沒則百世相繼先君之子孫皆宗之如大宗法國君主先君之祀上可及先君之太祖而下為先君子孫之宗故曰尊者尊統上別子為先君百世大宗之祖而不敢禰先君故曰卑者尊統下大宗者所以統先君之子孫非統別子之子孫故曰大宗尊之統也又曰繼別子之所自出

蕙田案鄭註別子有三曰公子曰始來此國

者曰庶人崛起為卿大夫者此二節則專申公子之宗道以公子有適庶之分有大宗小宗無宗之異所以著別子之義也注疏及呂氏之說得之

喪服小記別子為祖繼別為宗繼禰者為小宗有五世而遷之宗其繼高祖者也

注別子者諸侯之庶子別為後世為始祖也謂之別子者公子不得禰先君繼別者為其昆弟為宗也謂之小宗者以其將遷也五世而遷謂小宗也小宗有四或繼高祖或繼曾祖或繼祖或繼禰皆至五世則遷疏諸侯適子之弟別於正適不得禰先君故稱別子其子孫為卿大夫立此別子為始祖故云別子為祖別子之世世長子恒繼別子與族人為百世不遷之大宗故云繼別為宗也禰謂別子之庶子所生長子繼此庶子與兄弟為小宗比大宗為小故云小宗也五世者為上從高祖下至元孫之子此元孫之子則合遷徙不得與族人為宗故云有五世則遷之宗此五世則遷實是繼高祖之子記文畧爾若繼高祖之身未滿五世猶為服也鄭註小宗有四以別子之後族人眾多或繼高祖與三從兄弟為宗或繼曾祖與再從兄弟為宗或繼祖與同堂兄弟為宗或繼禰與親兄弟為宗一身凡事四宗事親兄弟之適是繼禰小宗也事同堂兄弟之適是繼祖小宗也事再從兄弟之適是繼曾祖小宗也事三從兄弟之適是繼高祖小宗也兼大宗為五繼高祖者至子五世繼曾祖者至孫五世繼祖者至曾孫五世繼禰者至元孫五世是皆五世不復與四從兄弟為宗故云皆至五世則遷各隨近相宗然則小宗所

繼非一獨云繼稱爲小宗者惟四初皆繼廟爲始據初爲元故特云繼廟也

是故祖遷於上宗易於下尊祖故敬宗敬宗所以尊祖

廟也注宗者祖廟之正體疏四世之時尙事高祖至五世之時謂高祖之父不爲加服是祖遷於上四世之時仍宗三從族人至五世不復宗四從族人各自隨近爲宗是宗易於下宗是先祖正體所以尊祖故敬宗敬宗所以尊祖廟也

吳氏鼎曰祖遷於上謂廟祭之祧遷宗易於下謂服屬所不及二者相因也

蕙田案宗有五大宗一小宗四大宗一者大

傳曰別子爲祖繼別爲宗諸侯之嫡長繼統

正位母弟而下不得宗之然不可無所統屬

故以次適爲別子爲羣公子之宗上以別於

君下以別於諸公子故曰別子上不敢祖先

君下自爲後世之祖故曰別子爲祖其別子

之世適族人宗之繼繼繩繩百世不改故曰

繼別爲宗又曰百世不遷之宗是也小宗四

者一繼廟之宗親兄弟宗之二繼祖之宗同

堂兄弟宗之三繼曾祖之宗再從兄弟宗之

四繼高祖之宗三從兄弟宗之大傳曰繼廟

者爲小宗又曰宗其繼高祖者五世則遷者

也繼廟言其初繼高祖言其終舉初終而四

宗備自此而上則親盡服絕而宗遷矣別子

亦有一謂本國公子爲士大夫而別於君

二謂他國公子來仕而別於不來者三謂庶

姓初起爲士大夫而別於不仕者鄭氏大傳

注云別子謂公子若始來在此國者王制注

云雖非別子始爵者亦然是也其公子宗道

亦有三有小宗而無大宗者如君無嫡兄弟

遺庶兄弟一人爲宗領公子禮如小宗也有

大宗而無小宗者如君有嫡兄弟使之為宗以領公子禮如大宗更不立庶兄弟為宗也有無宗亦莫之宗者公子惟一無他公子可為宗亦無他公子來宗已也大傳所稱公子有此三事是也凡言宗皆以繼子言不以公子言然而公子亦有宗道如所稱有小宗而無大宗有大宗而無小宗一則君命同母弟為庶兄弟之宗一則君命庶長權攝宗事大傳曰公子有宗道公子之公為其士大夫之庶者宗其士大夫之適者公子之宗道也是也公子之公晉曹氏謂君之庶弟受命為宗其解為是注疏竝指君言恐非孔疏別子以為第一子以下竝為沒世之始祖張子云如

別子五人五人各為大宗按以魯三桓例之此說亦是然與大傳公子宗道之義不合又滕推魯為宗國則兄弟相宗古禮應然魯三桓實始壞禮之家恐不當援以為例也五宗服制宗子祭禮詳見讀禮通考及大夫士廟祭門

又案以上五宗正義

儀禮喪服傳諸侯之子稱公子公子不得禰先君公子之子稱公孫公孫不得祖諸侯此自卑別於尊者也若公子之子孫有封為國君者則世世祖是人也不祖公子此自尊別於卑者也

注不得禰不得祖者不得立其廟而祭之也禰如其親服後世選之乃毀其廟耳因國君以尊降其親故終說此義云
楊氏復曰子夏傳云自卑別於尊是以子孫之卑自別於祖之尊此義為是自尊別於卑乃以子孫之尊自別於祖之卑此說於理有害而鄭註遂以為因國

君以尊降其親而說此義則又愈非禮意蓋國君以尊降其親謂降其旁親其
正統之服不降祖服期曾祖高祖齊衰二月是未嘗降其祖也鄭註蓋惑於自
尊別卑之說乃以封君之不祖公子為以尊降其親而不知公子為別子繼別
為宗謂之大宗百世不遷大宗或無後則為之立後世世不絕而常以公子為
祖矣若公子之子孫有封為國君則後世子孫只得祖封君而不得祖
公子以系其別子之宗非是以封君之尊別於公子之卑而不祖之也

蕙田案傳云公子之子孫有封為國君者則
世世祖是人祖公子此以後世祖此封君
者言之非謂封君之及身降其親而不祀也
鄭云公子若在高祖以下則如其親服甚得
經意其云因國君以尊降其親正因上文尊
同之義謂降其旁親耳楊氏誤會鄭意而以
封君自降其祖嘗之未是此不祖公子之義
可以定唐宋始祖之議矣

是故始封之君不臣諸父昆弟封君之子不臣諸父而
臣昆弟封君之孫盡臣諸父昆弟故君之所為服子亦

不敢不服也君之所不服子亦不敢服也

始封之君不臣諸父昆弟者以其初升

為君諸父是祖之一體又是父之一體其昆弟既父之一體又是已之一體故
不臣此二者仍為之著服也云封君之子不臣諸父而臣昆弟者以其諸父尊故
未得臣仍為之服昆弟卑故臣之不為之服封君之
孫盡臣諸父昆弟者繼世至孫漸為貴重故盡臣之

朱子曰始封之君所以不臣諸父昆弟者以始封君
之父未嘗臣之故始封之君不敢臣也封君之子所
以不臣諸父而臣昆弟者以封君之子所謂諸父者
即始封君謂之昆弟而未嘗臣之者也故封君之子
亦不敢臣之封君之子所謂昆弟者即始封君之子
始封君嘗臣之者也故今為封君之子者亦臣之封
君之孫所謂諸父昆弟者即封君之子所臣之昆弟
及其子也故封君之孫亦臣之故下文繼之以君之
所不服子亦不敢服也君之所為服子亦不敢不服
也

蕙田案朱子之說義最閎遠疏家以漸為貴重為言陋矣

白虎通諸侯奪宗明尊者宜之大夫不得奪宗何曰諸侯世世傳子孫故奪宗大夫不傳子孫故不奪宗也喪服經曰大夫為宗子不言諸侯為宗子也通典晉元帝建武初孫文上事宣帝支子不應祭章郡京兆二府君僕射刁協云諸侯奪宗聖庶奪嫡豈況天子乎自皇祚以來五十餘年宗廟已序而又攻乎異端宜加議罪案漢梅福云諸侯奪宗此謂父為士庶子封為諸侯則庶子奪宗嫡主祭祀也在諸侯尚有奪義豈況天子乎所言聖庶者謂如武王庶子有聖德奪代伯邑考之宗嫡也

蕙田案此章廣別子之義言公子固為百世

不遷之祖設後世有為君者則又當奪宗祖封君而不祖公子蓋所謂化家為國也此義明則後世有天下者始建國則立親廟親盡廟遷則以開國之君為太祖如漢唐明之太祖自屬不易乃列代有紛紛之議無有以此經為質者甚矣經學之疏也白虎通通典二條足以相証而士大夫小宗有起而為卿大夫者奪宗之義可以類推矣

春秋桓公二年左氏傳大夫有貳宗

注通子為小宗次子為貳宗以相輔貳音義為小

宗本或作為大宗議 禮禮有大宗小宗天子諸侯之庶子謂之別子及異姓受族為後世之始祖者世適承嗣百世不遷謂之大宗為父後者諸弟宗之五世則遷謂之小宗五世遷者謂高祖以下喪服未絕其繼高祖之適則絕服之內其宗之其繼曾祖之適則小功之內其宗之繼祖繼禰所宗及亦然大夫身是適子為小宗故其次者為貳宗以相輔助為副貳亦立之為此官也杜知井大宗而云小宗者以其大夫不必皆是大宗據為小宗者多故杜言之也若大夫身為大宗亦止得立貳宗官耳禮記據公族為說故言別子為祖主說諸侯庶子耳其實異姓受族亦為始祖其繼者亦是大宗但記文不及之耳沈云適子為小宗謂是大夫

之身為小宗次者為貳宗謂大夫庶弟
貳宗與側室為例皆是官名與五宗別

蕙田案大夫或是大宗或是小宗原不必限定貳宗為副貳以治宗事疏以為官名亦無據記云公子之公為其士大夫之庶者宗其士大夫之適者亦貳宗之意

陳氏禮書儀禮曰都邑之士則知尊禰學士大夫則知尊祖荀卿曰大夫士有常宗左傳曰大夫有貳宗蓋由士以上莫不知尊祖禰知尊祖禰則尊者常宗當其為宗則宗子統族人於外主婦統族婦於內死雖殤也必喪以成人齒雖七十也主婦不可闕居雖異邦也正祭不可舉妻死雖母在也禫不可屈尊與出嫁者不敢降其服賢者不敢干其任貴者不敢擅其祭眾車徒不敢以入其門凡以尊正統而一人之

情也惟其疾與不肖然後易之故史朝言孟縶非人也將不列於宗賀循言奸回淫亂則告廟而立其次凡此特義之權耳非其所得己者也方周之盛時宗族之法行故常棣行葦之美作於上角弓頰弁之刺不聞於下以此治國而國有倫以此繫民而民不散則宗子之於天下豈小補哉

右宗法

儀禮喪服傳大宗者收族者也注收族者謂別親疏序昭穆疏凡為大宗皆以收合族人使不乖睽者也

士昏禮宗子無父母命之親皆沒己躬命之支子則稱

其宗弟則稱其兄注支子庶昆弟也稱其宗子命使者弟宗子母弟

祖廟未毀教於公宮三月若祖廟已毀則教於宗室注宗室大

宗之家疏若與君絕服者則於大宗之家教之大宗謂別子之世適長子族人所宗事者也

禮記昏義祖廟既毀教於宗室教成祭之（注）祭之祭其所出之祖也

大傳同姓從宗合族屬（注）合合之宗子之家序昭穆也

儀禮喪服傳父子一體也夫妻一體也昆弟一體也故

昆弟之義無分然而有分者則辟子之私也子不私其

父則不成爲子故有東宮有西宮有南宮有北宮異居

而同財有餘則歸之宗不足則資之宗（注）宗者世父爲小宗主宗事者也（疏）有餘不足皆統於宗仍以明一體之義

足皆統於宗仍以明一體之義

蕙田案此雖以親世父言然以姪視世父卽

繼祖小宗也由此遞續之則世父之適子適

孫世主宗事有餘不足皆統於宗可也是卽

收族之義也

禮記內則適子庶子祇事宗子宗婦雖貴富不敢以貴

富人宗子之家雖眾車徒舍於外以寡約入子弟猶歸

器衣服裘衾車馬則必獻其上而后敢服用其次也若

非所獻則不敢以入於宗子之門不敢以富貴加於父

兄宗族（注）祇敬也宗大宗以寡約入謂入宗子之家猶若也非所獻謂非宗子之禮適子謂父及祖之嫡子是小宗也庶子謂嫡子之弟宗子謂大宗子宗婦謂大宗子之婦也言小宗子及庶子等敬事大宗子及宗婦也歸謂歸遺也子弟若有助德被尊上歸遺衣服裘衾車馬則必獻其善者於宗子此文雖主事大宗子其大宗之外事小宗子者亦然

通典奉宗禮賀循曰奉宗加於常禮平居卽每事諮

告凡告宗之例宗內祭祀嫁女娶妻死亡子生行求

改易名字皆告若宗子時祭則宗內男女畢會喪故

亦如之若宗內吉凶之事宗子亦普率宗黨以赴役

之若宗子時祭則告於同宗祭畢合族於宗子之家

男子女子以班宗子爲男主宗婦爲女主故云宗子

非七十無無主婦以當合族糾宗故也凡所告子生

宗子皆書於宗籍大宗無後則支子以昭穆後之後

宗子皆書於宗籍大宗無後則支子以昭穆後之後

宗立則宗道存而諸義有主也立主義存而有一人不悖者則會宗而議其罰族不可以無統故立宗宗既定則常尊歸之理其親親者也是故義定於本自然不移名存於政而不繼其人宗子之道也故為宗子者雖在凡才猶當佐之佑之奉以為主雖有高明之屬盛德之親父兄之尊而不得干其任者所以全正統而奉一人之情也若姦回淫亂行出軌道有殄宗廢祀之罪者然後告諸宗廟而改立其次亦義之權也

呂氏大臨宗法雜議宗子法久不行今雖士大夫亦無收族之法欲約小宗之法且許士大夫家行之其異宮同財有餘則歸不足則取及昏冠喪祭必告皆今可行仍似古法詳立條制使之遵行以為睦宗之

道亦無害於今法

蘇氏軾勸親睦今欲教民和親則其道必始於宗族古者諸侯之子弟異姓之卿大夫始有家者不敢禰其父而自使其嫡子後之則為大宗族人宗之雖百世而宗子死則為之服齊衰三月故曰宗其繼別子之所自出者百世不遷者也別子之庶子又不得禰別子而自使其嫡子為後則為小宗古者立宗之道嫡子既為宗則其庶子之嫡子又各為其庶子之宗其法止於四而其實無窮自秦漢以來天下無世卿大宗之法不可以復立而其可以收合天下之親者有小宗之法存而莫之行此甚可惜也今夫天下所以不重族者有族而無宗也有族而無宗則族不可合族不可合則雖欲親之而無由也族人而不相親

則忘其祖矣今世之公卿大臣賢人君子之後所以不能世其家如古之久遠者其族散而忘其祖也故莫若復小宗使族人相率而尊其宗子宗子死則爲之加服犯之則以其服坐貧賤不敢輕而富貴不敢以加之冠婚必告喪必赴此非有所難行也

羅虞臣小宗辨夫重本始聯族屬敘親疏別嫡庶莫大乎宗法宗之爲言尊也尊無二明無二嫡也宗以五世爲限服盡也服者先王所用爲宗子聯屬族人之具也服盡則親盡則廟毀故曰祖遷於上宗易於下此之謂也然自漢儒論釋紛如卒不可解孔穎達曰族人一身事四宗并大宗爲五考諸禮經原無四宗之說假令四宗爲之宗法視子孫互有異同族人以一身事之將誰適從此決知其不能也四宗

之說起於班固固之言曰宗其高祖後者爲高祖宗宗其爲曾祖後者爲曾祖宗宗爲祖後者爲祖宗宗其爲父後者爲父宗此固臆說也夫大宗以世祖爲宗小宗以高祖爲宗宗至四世族人雖各有曾祖及祖禰之親然視之高祖彼皆支子不爲宗得爲宗者高祖所傳之嫡而已是宗安有四乎或曰禮經所稱曰繼禰曰繼高祖何謂也曰據其初言則爲繼禰自其終言則爲繼高祖之傳嫡下及元孫推而上及於禰然後爲小宗者備矣夫小宗以五世爲率五世之內雖父子祖孫相承然世止一嫡耳序之以昭穆別之以禮義而後族人尊之爲宗故曰宗子有君道焉曰內則有云夫婦皆齊而宗敬終事而後敢私祭若子之說庶子無私祭乎曰此小宗事大宗之禮也小

宗雖有嫡子然要諸大宗則庶也小宗雖奉四代之祭然要諸大宗則私也故祭先公而後私先大宗後小宗尊卑之義也非庶子私之謂也

蕙田案宗子之義經傳諸儒之論詳矣然其法古今皆可通行蘇氏謂大宗不可復立而但立小宗亦非篤論夫大小一也未有大宗不立而可立小宗者也今世士大夫雖譜系不必盡備然亦必有可知者就其所知之中或係始遷或係始貴或係有道德而能文章不論世數遠近皆當奉以爲不祧之祖而爲大宗其當立廟者官爲之主而俾其子孫趨役卽不應立廟者亦令各建宗祠皆置公產以爲祭祠喪紀飲食課讀之費大宗掌其事

又擇一族人之輩尊而老成者輔之以下則五世各爲一小宗而祠堂公產亦如之小宗有故則大宗爲之經紀大宗有故則各小宗合爲之襄贊以尊祖敬宗之大義動其孝弟惇睦之天良則爭嗣爭產之弊庶幾可以少替而游手不肖之徒亦有所統束而不敢肆於風俗治化不無小補四海之廣固有一二家能行者亦有行之得其意而不盡合於法者有全未行者或爲上者率先而倡導之示之以規條申之以勸誘需之以歲月知必有起而應之者此實道德齊禮之一大端也

右宗子收族

